

芙蓉山館全集

繁華流蕩君子弗飲彫鐵費日博迺溺心好賦似俳耽書類淫  
連牝何傷忍俊不禁煙霄絳螭蘭茗翠禽喙噪徐庾攀追沈任  
朱絃組瑟金徽飾琴匪曰雕華中多古音

嘉慶端蒙赤齋若壯月既望芙蓉山人識

賦十一首記二首銘一首贊一首檄四首書九首序四十首壽  
序二首碑三首墓銘二首誄四首祭文一首書後二首雜文一  
首續刻文賦三十五首

芙蓉山館文鈔原本前後兩帙不分卷每帙止記葉數  
自一至十百而已弁首自題下所繫目錄自賦記至雜  
文合八十三首爲前帙之目續刻文賦三十五首爲後

帙之目惟前帙中序僅三十八首原目作四十首闕二  
首疑卽下文壽序二首誤合而又別出之按其葉數非  
有奪佚也後帙續刻文實八十六首原目云三十五首  
者據弁首自題作於嘉慶十年八月蓋其時實止此數  
餘五十一首爲後來再續之文故編次體類閒錯與前  
帙異而原目亦未加訂正將畱以有待也今以續刻之  
文依前帙體類倫次排比都爲八卷綜一百六十七首  
別爲目錄如左而仍繫原目於自題之下以存其舊云  
光緒辛卯夏六月重校訂

卷一 賦十四首 記十二首 銘一首 贊三首

卷二 啟六首 書十九首

卷三 序十八首

卷四 序二十三首

附小引

卷五 序二十一首

卷六 序二十一首

卷七 壽序四首 碑五首 敘略一首 傳一首

卷八 墓銘五首 墓表三首 誄六首

哀辭

祭文一

首 書後二首

跋

雜文一首

芙蓉山館文鈔目錄

芙蓉山館文鈔卷一

金匱楊芳燦蓉裳著

白雀賦

并序

乾隆庚子年余令環邑時祥集里民送白雀二雪羽揚鮮丹眸  
耀采瓊姿殊態曩所未見按符瑞志云王者爵祿均則白雀至  
方今 聖澤布敷徧逮羣品巖廊有畢升之彥倉庾無虛糜之  
粟靈貺神符不其驗歟既博稽幡簿旁考圖經異夫遐陬僻壤  
獲覩斯瑞其爲藻躍倍百恒情不揣瑣瑣爲賦云

誌嘉瑞於禽經識殊形於羽族惟神雀之來翔異凡雛之馴育  
素原天質潔非日浴白分豔雪之衣赤點靈砂之目是爲 盛

世之休徵以驗均平於爵祿爾乃揚翹林表拂羽山陬始翩翾而共戲遂婉僊以來遊相呼相喚爰匹爰儔珠雙輝而詎擬玉一珏以堪侔入夢似投懷之燕鏤形同刻杖之鳩是蓋奇傳鐵象精散璫光孕靈兌野炫色金方荀文表異唐典徵祥適雅音於謐隘和奇律於歸昌對舞則低迷璫鏡雙飛而隱見銀牆若解安巢四照珠宮之樹倘工啄粟雙岐瓊圃之糧方今玉雉來儀銀牋入貢三素書雲九光紀鳳惟太和之在宥致嘉祥之來送儀質殊觀羽毛足重緹紉可採爲披沈約之書藻綴難工愧乏善心之頌

廓爾喀貢馴象賦

并序

皇帝御天下之五十有七載湛恩龐鴻輝烈光燭符乾元之廣  
運合坤德之靈長是以日昃歸琛月竊奉土六服向化九寰承  
流雕題鑿齒之域望氣來庭吹鱗沒羽之荒覩道若愚圖書亮  
章宇宙榮鏡提封無外振古罕聞廓爾喀者紫舌頑人元蹄外  
境近身毒之國不解皈依隣舍衛之城敢行旅距弄修羅之鎧  
仗擾淨梵之旗幢

皇上撫覆育之仁不置邊方於度外邇照臨之智早握成算於  
掌中爰命重臣興行天討於是大將軍嘉勇公受牙璋而迅邁  
秉琅鐸而遐征沙度繩行履之如砥風災鬼難過處皆銷七縱  
七擒八戰八克其陷陣也如拉朽摧枯其奪隘也如決流却隊



賊勢窮蹙泥首乞降表奏 九重網開一面迺陳兵衛整軍容  
酋長蛇行種人蛾伏願執壤奠請受纓廩任鞅兜離附宮懸之  
列嬰瓊盞瑋瑋入王會之圖厥有馴象亦充方物此漢樂所歌象  
載瑜白集西者也遂踰紫山越青海入玉塞至金城士女頒賦  
觀者塞道千百年聞耳目僅遇自非

皇威遐暢遠人賓服曷克致茲 臣幸際昌期預覩盛事不揣櫛  
昧敬爲賦曰

惟 聖代之威靈方濫古而無匹邇安遠肅陸轡水慄彼負目  
與戴斗咸瞻雲而奉律何蕃部之蕞陋恃巖險而咆勃天戈所  
麾上將莫敵聽柝鼓之雷賦望邇旗之電掣迺乞活於旌門願

輸誠於丹闕欲知夫異類之傾心豈觀乎牙獸之屈膝爾其產  
吉雲之野浴金沙之淵吸甘露飲榮泉其性則馴其力則全傍  
牟尼之座應瑤光之躔歷崑崙之脩阻涉瀚海之環連如騶吾  
之呈祥漢代比當康之表瑞堯年徒觀其異質魁梧殊姿瓊瑋  
兀立山峙徐行邱徙牙輪囷而類胛鼻連螭而若尾始盤跚而  
勃罕乍磊落而騰倚或呀呷而如怒忽婉僊而似喜吁可畏其  
駭人已非恒情之所能擬况復駕金根之華輦立玉階之仙仗  
竦雙闕之岩甍啟九關之朕蕩被以朱轡飾以文鞅圖壇星概  
觚稜日上導班駟而引鸞旗夾陛楯而趨虎帳凡夫狼蠡鳥章  
之君鑲耳貫胸之長仰儀衛之凝嚴情威容之森爽莫不樹領

惕伏回面內嚮是則表薛人之歸義章

皇心之在宥宣威句陳之側示武執法之右不寶異物非求奇  
獸豈比夫詔文單而教舞幸洛城而觀關供耳目之娛誇職貢  
之富云爾哉若廼索犀犛於黃支致狡獬於大秦諛諛珂之類  
鳳訝桃拔之如磨紈牛露犬之屬乘黃玄白之倫惟猛犂而難  
援縱奇詭而非珍詎若茲覩服習於巨獸示羈縻於遠臣遂令  
亭障之吏邊鄙之民譴謠動地冠蓋驅塵相與慶來王於萬國  
卜耆定於千春

摺扇賦

白羽翻風青萋翦月輕名蝶翅賤呼狗脊綺閣則雉尾移雲椒

殿則鮫綃凝雪芳園障日荷殿迫涼麗綴珊瑚之佩芬垂蘭錦  
之襲妙句則暑題文暢異物則遠贈思光飛燕入而怨歌班女  
芳姿去而羞見王耶問當年之巧製曾不外乎闔方何代良工  
爰翻新樣劈竹湘江之左塗金漢殿之上琢象華而紋碎疊銀  
牋而光漾層層開雲母之屏曲曲展巫娥之幃重以折枝低亞  
小字斜書雲絲帖帖墨暈疏疏蕭娘寫十香之句劉郎搗百蝶  
之圖清影動而戲魚躍素光展而飛蛺除絕勝迎涼之草何須  
卻暑之珠深貯錦囊低垂香串宜卷宜舒一重一掩蘭館翠英  
金閨諸彥贈人鳳閣之上拊馬章臺之畔月吐半輪風輕一翦  
能遮庾亮之塵不被褚淵之面煙波畫舫裴履紅橋高擎彩袖

低掩珠翹玉骨稀而臉霞微霽蘭風動而衣麝徐飄木葉秋雲  
新句好桃花淚點別魂銷歌曰阿誰裁蜀繭方趨製偏工錦紋  
收宛轉清影逗玲瓏碧纖半擎雨蒲帆初罷風九折無窮盡柔  
腸訝許同

素蘭賦

錢樛寮先生齋中有素蘭一叢余愛其姿致娟靜爲之賦云  
素鍾應律素商標爽雲澄霽以空明月含輝而晃朗初過蓮渚  
之遊未展桂巖之賞則有湘江異種閩嶠靈根初呈皓質乍返  
香魂影亭亭而獨立情脈脈以忘言水玉皴而佩環留影石華  
散而衫袖餘痕爾其孤韻自持幽芬頻送泣露如啼澹烟似夢

魚魴青瑩鮫珠碧凍茗華並麗宜栖翠羽之禽梅格同清好挂  
綠毛之鳳曲榭玲瓏迴廊深窅憐九畹之清淒憶三山之縹緲  
護香則銀蒜簾垂照影則冰荷鐙小十朵五朵一枝兩枝根依  
翠石葉拂黃磁客與楊林之步便娟姑射之姿悄含情兮坐對  
羌有意以相思是宜留伴孤斟長陪朗吟神清欲化韻遠難尋  
墨香浥浥琴德愔愔惟主人之素抱與芳草而同心歌曰蘭品  
如君子猗猗發潤阿攬之情未已佩此意如何不入燕姬夢曾  
傳楚客歌高情應儷雪清致較還多

夜明鰕賦

并序 十一歲作

乾隆癸未秋初清華從祖招諸子姝小集池上雨過夜靜荷開

水香酒闌離坐俯檻眺矚見流光繹繹池底如織因命僕人網  
而出之得鰕大者盈寸小如黍粒俱表裏晶瑩滅燭視之光照  
几席衆其歎異因考箋疏及古詩篇均未之詳也惟金樓子云  
帝舜時海民來獻珠鰕夜明有光此或其類歟匪惟家祥抑亦  
國瑞從祖命各以文辭紀之余以卯角隨父兄後敬爲賦云  
水檻迎涼風亭消夏翠蓋全蔽紅衣半謝觴酌初闌談諧欲罷  
俯方池之一鑑訝流輝之四射珊瑚網舉餘珠胎捧乍羊燈息焰  
光浮磈碗三升兔魄韜明影透珧牕一罇爾其往來玉漱隱見  
銀塘度澄波而映澈隔密藻以微茫文鱗作伴紫貝成行輝流  
涵苔影照鷺鷥爭星影之雙雙佳期七夕效月鉤之曲曲良夜

三商若乃形遺山海之圖名軼物產之誌惟重華之盛世有珠  
般之獻瑞竊以今而方古可比物而連類得氣稱珍含靈自媚  
空明真水母之目瑩淨豈海人之淚若使呈祥太液定耀采於  
綢圖且令流照文房看增輝於綠宇

送年賦

并序

少作

竊聞別人有重見之時別歲無復來之日百年長夢骨驚腦隙  
之駒萬事浮雲魂栩栩園中之蝶陰無禹惜車任義馳夸父攜杖  
以空追魯陽揮戈而不返歲云暮矣能不凄其嗟乎若木枝枯  
咸池溟涸接漏天之霧雨厯黑海之波瀾風吹廿四番花蕊綻  
華園之樹月滿十二度珠胎迸靈穴之光水既逝以難回功告



成而當去白榆林畔瑤草洲邊歲其行乎吾負汝矣因念長途  
羈客窮巷騷人瑣牖紅粉之樓罽帳黃雲之塞各同悲銘骨恨  
抱徂年用述閒情以供點筆辭曰

烏輪易墜龍燭不然風掀地軸雲凍天關山翠嶺而奇色野懽  
惓而苦寒荒池陷月古木留煙獸投穴以如蟄鳥棲林而不喧  
年辭我兮景黯澹我送年兮涕潏潏月窮於紀星周於次火井  
煙銷冰天風厲黍谷則吹律回陽葭室則壯灰驗氣元霜亂飛  
黃流息沸南浦之楊柳枝枯北苑之梧桐紋碎莫不隨年華以  
搖落慙風煙而凋悴憶初迎歲綺隊香叢暗塵冉冉暖霧濛濛  
點梅妝於瑤殿吹蘭帶於金宮趙后則觀開卻月紫英則臺名

避風燕婉鷺嬌兮情非一花穠柳姁兮樂未終既而令投炎官  
序傳青女玉管調商銀箏換羽甘瓜沈水之戲彩扇迴風之舞  
暑避蓮房秋生桂樹月沁犀簾花繁羯鼓隋苑則萬斛飛螢唐  
宮則千枝寶炬勸王孫兮自可留惜華年兮不遽去何期世短  
意長星移物換五勝轉環千年激箭虞淵飛勸鵲之書牀谷開  
餞行之宴盛鬢如絲萎華似鰕鴈飛鳩伏顰藏蜃現車迴晝夜  
之轉治扇陰陽之炭悟大化之潛移愧微生之善變玉顏難駐  
金丹空鍊登白蘋兮傷懷望青年兮不見心同黃蘗之苦淚似  
紅泉之泣於時悽涼行客問關遠道家鄉一夢形影相弔陷馬  
而蜀坂泥深摧輪而秦關嶺陷鵲飛揚狐狸叫嘯鬼哭荒陵

鷗鳴古廟飢掘蕒精暗隨赤燒貧銷湖海之豪寒助風沙之貌  
冰割傲裘霜欺破帽歲歸而人未歸寒到而衣不到澆愁借旅  
店之杯顰眉寡長安之笑又如陋巷寒士蓬門布衣翠樽塵漬  
親故星離雪照孫康之簡風寒董子之帷竈泥龜坼窗紙蝶飛  
添薪而蓬蒿刈盡空廩而雀鼠來稀卒歲計左求人氣低囊藏  
焦麥畦剗寒糲持舊券而客肯索殘飯而兒啼雌風號而樹急  
愁雲壓而山頽流年告別涕泗交隤更有黑河遠戍黃榆永訣  
電散鼙迴鼓衰戟折箭枯梟鳴馬毛蝟磔摧征轡於三危碎戰  
艦於八節刃尖傷手喉中卷舌雪飛如席冰堅似鐵寒勁而雁  
塞雲高年盡而狼河月缺節士抗塞北之譟降將痛河梁之別

皆聽刁斗以驚心  
睨刀鏃而投血  
至若妾居淄右  
君戍河陽  
人隔萬里音滯一方  
風欺犀押月厭象牀  
簾卷沈碧機斷流黃  
丹心一寸紅淚千行  
帳額繡單栖之鳳  
鑪中銷一氣之香  
愁彈玉軫倦點金璫  
夢短而蘭釭易燼  
妝懶而瑤鏡無光  
撫流年之晚晚黯無語以神傷  
嗚呼年代迅速雲烟寂寥  
去若電掣來若蓬飄秋實旋落春華蚤銷驚颺雨嘯哀鵠風號見荒榛兮鬱結歎白楊兮蕭騷藍田玉其青烟化空谷蘭隨野火燒望美人兮雲悅名招黃鵠兮風調刁歲無情兮若此棄我去而迢遙歌曰北郊方送歲東苑又迎春  
霽日翳花麗青陽雲物新  
雕籠熏翠被珠履御金輪  
當歌莫長歎重傾碧玉樽

春懷賦

十六歲作

春山滴翠春水流香雲浮紅蕊日麗青陽東皇駐兮芳苑花史  
醉兮柔鄉華桐發岫紺穠盈塘綻玉桃於露井倚文杏於銀牆  
何春融之豔豔更春物之昌昌覺春情之澹蕩任春夢之悠揚  
撫流光兮心自惜極遠目兮思何央故麗景千變而離懷殊狀  
若夫明河乍沒曉星微亮漢東蚌缺汝南雞唱農颶入鳥骨之  
簾暝日上蛭毫之障拓窗而遠岫低窺拂鏡而繁花相向義餘  
約夢之香杯滿扶頭之醴推山枕以低徊倚玉闌而惓悵既迺  
晴陽明媚豐晷舒遲頰蘭轉風黃鳥思時草黏落絮花罽游絲  
禁烟輕颺簾影低垂岸烏巾而敲側抽細帙而參差校仙子芙

蓉之譜詠佳人巧藥之詩拈綺語兮皆有託破禪心兮不自持  
俄而夕驚墮水絳氛掩漢目足照餘霞紋斂半下翠幔之雙鉤  
卻雲屏之六扇桃花水煥楊柳煙輕一梳蛾月幾點華星杏梁  
燕睡柘彈鳥驚網戶虛而半闔金釭暖而微明若有人兮聲相  
喚攪余愁兮心不甯更迺重陰沈沈小雨漠漠鷗波漲兮圓文  
迴梨雲凍兮愁蘼蕩岑寂池亭低迷院落吹怯夜之輕幡溼護  
花之綵索灰寒鵲尾之鑰苔澀魚鱗之鑰屏么絃而不御檢生  
衣兮愁著滯躡柳之狂遊負尋芳之佳約坐悵悵以長愁獨惜  
惜其不樂誰最悲者厥有旅人于役隴外之官漠漠欲馳聲於  
京洛遂鞅掌於風塵望故鄉兮雲渺渺遵道道兮車聯聯岸柳

織千絲之恨水花漂萬里之身猶復小駐旗亭閒尋驛舍藉淺  
草以行觴折垂楊而拊馬感物候以心驚愴關河而涕下日暮  
途遠形孤影寡各自媚兮入門問誰憐兮勞者至若妾家燕趙  
君成寘顏芳年三五長途幾千淚流波而不息心膏火以自煎  
厖有蘭心鎖春恨詎將玉貌鬪春妍桃憐羞子荀看成竹穉鷺  
漸老眠鸞已熟匝歲無書經春獨宿積愁落鬢長啼損目錦字  
頻挑金錢暗卜祇喚響以相酬還持影而自逐別有玉壘妙麗  
珠館妖韶謾生貝錦淚染鮫綃一曲之荅華空記雙鸞之桂葉  
誰描緘深情兮莫訴鬱長恨兮無憀攬嘉夜而銷魂採文無而  
露臆倚羅幌而晝長怨洞簫而春寂草延紅蝶門掩青苔已向

花朝惜花落那宜春日上春臺裙帶解兮妾有夢手巾溼兮君  
不來更有麟角才人薦肩公子軼名多姿風流自喜悵慧業於  
三生結遙情於千里謝尙則倦枕琵琶衛玠則不勝羅綺念同  
心之寥落惜良會之分攜騷客愁而雲波淼淼王孫去而烟草  
萋萋柑酒聽嚶鳴之鳥風雨聞膠角之雞嗟乎何風物之暄妍  
引襟懷之悲悄臘鴉呼春棠梨怨曉盧大夏瑯車之日氣韻蕭  
疏王山陰總髮之年神姿清劭何如平子思元延之埋照勸影  
揮柁撫絃動操任天忘達士之機排悶發才人之藻唾壺擊碎  
向碧落而長歌如意舞酣對清風而大笑也哉

擬盧照鄰秋霖賦



原夫溽暑未闕窮陰已積萍號興於兌位常儀離於畢域游氛  
藹以凌晨屯飄靄而迎夕山黯黯以藏暉野蒼蒼而晦色遂乃  
鞭策雨工奔馳雲族神蜃行空潛虬起陸纒霄樹以冥冥旋敲  
牖而簸簸拂高瓦以跳珠灑廣除而囁玉摧砌蕊之愁紅破庭  
莎之幽綠既盡日以淋漓竟連朝而滲漉輻懷易感秋思無憯  
頽牆薜荔空院芭蕉冰絲倦撫湘帙閒拋苔及杜陵之榻魚生  
范史之庖香心徑而易燼鐙焰短而頻挑憶良儔之寥落嗟故  
國之迢遙數對牀之情話記翦燭之清宵獨驚離而弔夢祇坐  
嘯而行謠更乃防儉歲於邊陲念下農於菑晦早穗黃懸晚稻  
紅朽穿漏兮團焦支離兮寢藪深愁食玉與炊桂空望乞漿兼

得酒憎積潦之盈階警頑颺之人牖襟懷抑塞兮有達之心行  
止拘攣兮如楊在肘矧夫薄宦有程浮蹤莫定忽驅車以濡軌  
迺策馬而旋湍亂眼雲昏霑衣風橫頓倦轡於茅檐然溼薪於  
塵甌屋古多寒牖低易暝飄蕭增客路之悲斷纒攬勞人之聽  
遵世之占莫能神武仲之行焉用聖急響疑停高空轉清旛書  
戊己圖成丙丁咒癡雲兮裂罍呼駛風兮作聲祝月華之豔婉  
盼霞彩之晶瑩吾將詠南樓之秋夜先與賦西堂之晚晴

### 憶江南早春賦

宦遊十載隴頭人最憶江南物候新融融晴靄浮佳氣澹澹烟  
姿媚早春幾點遠山凝薄黛一番香雨過輕塵莫愁湖畔冰初

泮齊女臺邊草未勻韶景舒舒風光倩倩過剪綵之佳辰罷傳  
柑之罪讎梅點額而微飄鳥鳴心而始轉葉淺未藏蜻梁空猶  
待燕重欄日晷遲別岫雲容變漸芳意之相催知勝遊之可選  
爾乃名園閒寫俊侶爭邀輕衫乍試細馬初調任吹花而嚼蕊  
更摘葉以攀條路出烏衣之巷波通朱雀之橋才人紈扇佚女  
珠翹碾杯泛月蘭漿乘潮銷憂宜假日倚醉竟連宵誰肯續墜  
歡於後約尋晚景於邊嶺人共春以爭妍春似人兮未老憐呵  
鏡之微寒嬾倦簾於清曉苔髮青疏花房紅小對烟景之澄鮮  
愛物華之娟好琴彈鳳翮鑪熏鵲腦託逸興於吟譚豁遙情於  
懷抱春色正無邊春華絕可憐尖纖春月初三夜嬌小春人二

八年雲輕似夢水碧如烟開看山而獨凭船聽雨以閒眠覺別  
來之未久問再見乃何緣況乎倦客羈孤邊城寥寂厲風猶勁  
蛟冰未裂雪暗山遙沙平路直日曠曠以藏輝野荒荒而寡色  
能不含愁榆塞之笳寄恨玉關之笛羌笛相和金笳按歌感年  
華之晚晚傷容鬢之蹉跎彭澤之閒情不少蘭成之怨句偏多  
歌曰天涯春色未闌刪奇樹中庭已可攀浪迹久留雞鹿塞離  
魂常到鳳凰山從道江南有人憶好教征客共春還

老樹賦

偶遊西直門外廢寺見老樹斷藤  
狀極奇詭朱野雲作圖余因賦之

悄焉獨遊憐兮古愁俯仰曠宇低徊廢邱上遺臺而眺遠聽窅  
水之鳴秋盤根互軋勁幹交樛問何年之老樹挾爽籟以颼颼

爾其冰霜今古風煙朝夕附贅懸疣流膏注液禿枿如髡駢枝  
似擎猛兇突角饑蛟露脊鬪黑狔之三尋拔元雲之百尺拘攣  
貳負之尸犖确蚩尤之額足使匠石驚而斂手山精賊而褫魄  
況復鶴警苦月颺餐瘦煙衝風氣奪朽壤根穿倒挂則宛絲欲  
斷寄生而禽華不妍介性偏宜地僻孤標詎受春憐若迺過勝  
境而流連供騷人之撫玩能全劫外之生終勝薄中之斷長淪  
落以自甘顧婆娑而何歎惟餘藁氣之未除遂繼怪魁而作贊

斷牆賦

花首龜旁耆閭岨後草沒幽墟沙埋斷甃遠荒圃之逶迤見簞  
牆之延袤巖若斷山兀如古埃豈陵崢而岸隋抑風穿而雨溜

遂頽隳乎崇基賸摧殘之落構襍珉半蝕澀浪平傾屹三成而  
並墮蝨一面以孤撐妖藏虺蟻黠竄踴蹙遂悲蛄弔篆涇蝸行  
藤蘿隱翳枳棘縱橫雨積而蟻衣亂上霄深而鬼炬爭明重以  
野果懸丹秋蕪翦碧蜀錦殷鮮秦灰黝黑隋崖奇狀頽雲怪色  
何代磨礪幾年雕飾徒勞縮版虛煩密石慨碑甃之僅存詎樓  
臺之可識千年古刹一片斜陽翠沈煙暝紅黯霞涼閒尋幽藪  
獨立蒼茫疑寶衣之欲化如畫燈之猶張渺古懷其何託長發  
歎而循牆

擬庾子山小園賦

蓋聞汀澹之魚不知浩湯之鉅解枋榆之鸚甯羨翳薈之繁林

安巢則不過一枝環游則有同千里余故家新野僑居瀟陵感  
羈泊之多艱思林泉之暫適幼興耽隱寄興邱壑之中叔堅嗜  
書放意與蓋之外招枕石之畸士慕考槃之碩人雖鬻麀而可  
容甘泥水以自蔽冬菰春韭羞免飢虛曉筆暮詩足娛疲朽優  
哉游哉聊以卒歲者也爾乃杜曲淹留茂陵樓止苟投足而咸  
安信余情之所擬激流植援誅茅藉芷藺葑密而鳥喧亦潦盈  
而鷗喜烟霞繚繞松篁邈迤就曲岸以流觴對平厓而隱几迺  
關榛蹊遂開蔬圃谷暗留雲林香過雨花共色而異株鳥同聲  
而別樹池淺鷺漁梁空燕乳縛香茆而作亭架文杏而爲宇倦  
移向榻之牀閒捉張譏之塵願畢景於岩阿何縈心於鐘庚嘯

傲林霞徜徉圖史恥爲夜客自稱冰子類相如之任誕異敬通  
之見抵非頌酒而閉關廼養疴而卻軌逢輔嗣而談元對漆園  
而言理識野老之忘機悟達人之知止埋盆作沼壘土成山幽  
能皎潔近可循環緣坡莎滑坐石苔斑長卿綠暗簡子紅殷雉  
牖而遙峯競入投林而倦鳥爭還遭豈繫坯暝還倚槁溪外負  
薪田中荷蓀瓜廬星晚蓬門露曉槐短黃疎松新翠小探杞葉  
以煎羹釀蘭漿而酒醪魚生范史之庖蛙躍孔珪之沼投老邱  
樊身閒灌園籬東藝菊堂北栽蕨散穀皮之書帙對壺盧之酒  
樽竹低妨帽柳暗藏門領絃歌之靜趣無車馬之塵喧適興而  
天機自溢養拙而吾道斯尊坎止流行安於所遇不材同於社



欒無用儕於康瓠恨髮容之難待慨景光之不駐掌庾之世德  
猶存射策之年華非故地幸借夫鷦栖情莫嗟夫萍寓隙地數  
弓荒園十步雨後鋤瓜霜前收芋聊擬仲長樂志之篇長吟不  
子歸田之賦

一角湖山樓賦

并序

玉年許君娶於吳門呂氏得淑嫺焉姿質清惠無愧古媛薈華  
凋薺未登下壽玉年感深奉倩愴甚子荆長簾竟牀遺挂在壁  
一角湖山樓者昔時結褵地也香銷衽席蕙落綈綈歸魂之室  
然明鏡而不輝合歡之帳棲流塵而易黦追憶影事託之妙繪  
余悲夫青春易謝朱榮倏實妝臺儼存鏡檻已徙展圖悼歎爲

之賦曰

苕遊飛樓玲瓏空界湖淨開匳山明點黛三成華隱之居一角  
河陽之畫匏爵靈緣文簫墨會卷珠箔以同凭拓文牖而相對  
月映銖衣風鏘蕊佩冰甌則碧乳清冷霧幌則香鬟醺醺蟬前  
蜨後葉蚤花初納浮嵐千網戶蕩晴波于綺疏明霞拂鏡溼翠  
侵裾匣開翡翠硯滴蠟蛛繙瓊釵金鏤之冊檢蘭熏粉澤之書  
何圖菡萏風凋菱荇霜翦瑤軫絃摧玉鑪香殄翠萼參差紅鬣  
宛轉影分連理之枝絲斷同功之繭檀奴之永逝空哀元九之  
悲懷難遣靈姻易散僊夢難長臺空月墮峽黯雲涼金經鸚鵡  
香冢鴛鴦塵滿蠅蛸之屋雨昏薜荔之牆蝶去而花殘舊砌燕

歸而泥落空梁試覓釵痕慵憑斷檻疑聞屢響誰遶回廊彈指  
三生驚心五勝呼妙子以不聞禱神巫而莫應石潛英兮易泐  
鎖歲鞋兮孰贈鰥魚之目常醒鮫客之珠欲迸與嶠沈浮蓬壺  
阻修鸞叱鳳靡海思雲愁花何爲而續命草何事而銷憂玉格  
琅函曾標慧業蕊珠光碧合證仙遊其憐一曲淒涼長歌子夜  
詎識三山縹緲別有辰樓

鬪寒圖賦

輕冰在地涼星滿天霜濃似雪月淡如烟抱閒愁之耿耿度修  
夜之綿綿結遙情兮無語攬清輝兮可憐想夫青女嫋嫋素娥  
嬌嫋凌天宇以同遊駕鸞輪而徐馭散花則玉蕊齊飛開鏡則

銀雲低護銖衣隱霧仙骨爭清瑤佩鏘風明姿欲妬爾其吹香  
冉冉弄影亭亭秀鬢垂綠長眉暈青寒生在渚之波湘娥佩解  
凍合斜河之水織女梭停哀彈連璫虛籟流鈴獨客之悲吟未  
已幽閨之別夢初醒夜靜聲繁響落驚鷺之瓦更深影仄明穿  
翡翠之櫺於時蘭燭光微蓮壺漏永被掩珠塵鑪銷芸餅送蟬  
迎雁由來詩客工愁踴鶴驂畢竟仙人耐冷舊圖展處憐金  
屋之淒涼新句吟成愛玉溪之清響

重修漢平襄侯祠碑記

伏羌縣城四隅舊有漢平襄姜侯祠歲久傾圯乾隆癸卯春余  
宰斯邑改而葺之縣人咸請立碑余削簡而稱曰溯夫郭塢之

大星已隕蜀都之王氣將終以羈旅之孤臣受軍國之重寄卒能奮忠勤仗膽義搢拄偏安之局恢張薄伐之勦洎乎虜主迎降全師解甲猶思運曲逆六奇之策收卞莊一舉之功壯謀未成苦心莫亮揆其本末有得言焉按蜀志侯諱維字伯約天水冀城人紹忠節之家風負倣儼之才略傾身養士結髮從軍仕魏官中郎參本郡軍事值蜀兵壓境太守蹇胤信乃見疑窮而歸命武鄉侯見而異之教以虎步千人目以涼州上士馬援明智之識臣亦擇君豫讓俠烈之風士爲知己建興十二年武鄉侯卒進大將軍錄尙書事封平襄侯遂乃繼祁山六出之舉興石營九伐之師拔臨洮三縣之民糾漢樂二城之衆部落面向

羌戎響臻自隴以西可斷而有也無如讒臣構釁閹豎擅權撤  
涓土之兵作沓中之避宮鄰內逼勦敵外侵徒恃劍門之險竟  
失成都之守陰平閒道之銀衡鐵牡之防綿竹孤軍有猿鶴沙  
蟲之慘君甘銜璧士盡與尸棄三分之業廟社成墟奉尺一之  
書英雄束手遂使三軍斫石氣湧如山五將投戈涕流被面吁  
何悲也夫范蠡策越保甲楯於會稽田單復齊馳鐵籠於卽墨  
莫不奮折翼於已墜噓死灰而復然名著區中功成理外蜀雖  
顛路外有聲援霍紹先之勁卒尙鎮夜郎羅令則之重兵猶屯  
白帝向使前驅五萬仍用蜀人白梃數千盡坑戮將艾先自斃  
會亦我禽金刀之祚中興火井之光復熾未可知也而乃空置

密表竟發陰機寃遭紀信之焚莫効勃蘇之哭嗟天道之難問  
詎人謀之不臧是則襄世期之記注尙屬知言孫安國之陽秋  
徒爲目論矣縣爲古冀城地侯之故土也黃神紫嶽昔年曾誕  
英靈雲馬颺車此日應歸魂魄某式瞻遺範來謁崇祠霜露年  
深丹青歲古報功之典攸缺守土之責奚辭爰翦茅茨聿修棟  
宇抒下土之丹忱焚椒粢鬻紀前賢之偉績勒石磨崖庶幾風  
雲鬱起遙迎蜀相之祠松檟森行永護靈公之社云爾

弁山舉大中丞靈巖讀書圖記

靈巖山者姑蘇之名勝也瞰孰哉之故里枕闔閭之舊城林壑  
逶迤岡巒窈窕鐫刻特秀徘徊識造化之功結構多奇彷彿入

靈仙之境則有藥房竹鳴苔閣茅亭長阿連石華陽曾此棲遲  
穿徑臨江蘭成於焉寄寓此我大中丞弇山夫子少時讀書處  
也夫子瓊文華國碩學經時名冠螭頭夢徵鼇背 九乾動色  
賞河官山柱之辭衆僞傾襟傳桐露槐烟之句泊乎宣猷兌野  
持節金維風行十部則桴鼓靜黃圖才擅九能則庾縣供玉策  
洵人倫之淵海學者之斗山矣夫若華敢耀彩煥九枝榮河始  
流源成五色文豹變而呈隱霧之姿建木生而有凌霄之氣大  
抵萬里功名肇於早歲千秋事業各有名山夫子幼卽岐嶷少  
而通博五行俱下萬卷咸披腰橫紫志卽是文星目有青睛知  
爲慧相舉凡壁誥威書之藏篆佉廬沮誦之秘文金繩玉檢七



十二封鳳紀龍圖四十六事莫不胸開秘府手握元珠摘壯彩  
以雲飛運英思而泉瀉彼夫謝宣遠紫英之贊揚子雲靈節之  
銘任彥昇月儀之篇岑文本蓮華之賦雖並珥車馳譽總角知  
名但徒事夫枝條未深探其根柢鬼瑣之才曷足云矣茲者有  
憶故山回思綺歲令丹青之妙手寫鸞鶴之殊姿半郭半郊一  
邱一壑烟霞照灼水木清華丹騰綠筍滿牀蝌蚪之文綵襟香  
緘插架琳琅之軸露初握槩星晚移鐙黼藻九流笙簧六籍是  
知鄴侯黼寺已覩公輔之才謝傳東山早躋蒼生之望也已某  
昨奉緒言命題幘首廣桑山上悟徹席之緣通德門前憶橫經  
之樂弄太冲之柔翰熏南豐之瓣香吳中之山水依然天下之

文章在他時問字侯芭過草元之亭此日操觚薛收撰牛溪之賦

江鄭堂書窠圖記

鄭堂先生癖耽典素勤味道腴佩經之雅言執古之醕聽敬通著顯志之賦令思輯辨道之編甲乙部裏綜七錄以精搜庚子日中列五經而下拜編韋撻鐵抱蕊懷鉛洵著作之杓魁儒林之雄彥矣某夙仰盛名久託神契尋高惠於夢中之路疑公輔爲天上之人茲來維揚得奉譚譙岸幘廣坐舉杯相於著錄若海知經術之湛深談辭如雲服襟度之奇雅時君以書窠圖見示讀君自記之什而有感焉君天稟徧通弱齡繁慧朱育萬卷

應奉五行細素盈牀綃繩壓架食仙字而自喜聚鬼名而不嫌  
侯岡沮誦之秘文唐述謨觸之奧義墨書盈掌元珠在胸攷同  
撰異終晨迄暮紛紛欣欣其獨樂也然而大雲五色與草一塵  
文具難施才高不遇兼之無禾歲祲負米心傷織黎苴以博餐  
拘蟬蠅以資養遂乃欲然魯論竟典班書過西垂之藁家問北  
道之阮氏俾青箱赤軸盡入塵埃玉策金繩半歸駟僮良可慨  
矣君乃豐約不易其操榮悴不膠其慮含咀煙墨菲枕圖史禮  
堂所定已有傳書蘭臺所藏尙多異本董過百遍而見義王筠  
重覽而興深織簾餘閒惟緝墜簡仰屋無事常思誤書鄭北海  
既精且博荀蘭陵惟專故傳名山千秋不在多也某識愧溝猶

質惟樸昧恐小言之破道知雜學之非儒魚豕舛誤既未能詳  
蠱虎紉碎又非所習衰髮苦短徂年易流憂患紛乘塗路羈泊  
所攜舊帙亦已散佚焚書而舞擬學王壽掩書而泣或類賈逵  
願授專經敢媿羣雅康成車後塵垢一囊子駿書中油素三尺  
古歡既洽略彼文字故物已失託之丹青求利劍於希夷得元  
珠於象罔有形之妙固不若無形之神也已

### 簡圖記

將於三山二水之間爲谷飲巖栖之舉尋明僧紹之故宅追陶  
通明之昔游崇欄霞褰石室雲構猿鳥爲侶風月無鄰鑿山架  
壑物力未免過勞離塵絕俗人事無乃太簡余以爲抱山澤之

志則纓紱亦有俊人愜林泉之娛則城市豈無佳境會心故不  
在這悅性何假外求心農先生高懷淵沖雅度夷曠幼興入宦  
邱壑獨存彥寶卜宅山池居半茲於所居之東偏葺舊有之林  
亭度自然之巖岫松寮樾館辛楣葺房陽坡三成露檻九折茂  
灌翳蒼葦成奇煙方塘醜深蕩此空影磴道相屬飛樓翼然中  
峯倒景之臺四明棲雲之榭擬自平壤斯爲振奇排窻翠而開  
楹抗宛虹而架棟鍾阜峙其左治城環其右東牖延煥亭亭朝  
曦西牖挹爽寸寸秋色納萬景而競人指三霄其不遐所謂樓  
外樓也曲逕逶迤斜折而北水明若鏡亭孤於丹露荷送香風  
篠簹彫麗鳥爭集樂魚時翻則鷺鷥亭蘂花艤也略約低轉麗

廚暗通湖淪浮翠林香襲袂水鶴入座時來銜箋野鷗窺客欲  
與爭席則迴波檻也單椒秀澤跳岑隔煙髻茅作堂依桑結屋  
溼翠陰映宵崖玲瓏懸溜落澗室未雨而已涼垂蘿罽檐衣不  
染而自碧則卽巖成館在焉其餘亭榭尙不下十餘所均極水  
木之明瑟肇山川之麗崎洵足以雪滌煩襟瑩發靈矚是知固  
之以簡名也簡於雕甍刻桷而不簡於禽魚花竹也簡於煩文  
苛禮而不簡於琴樽文史也爰以暇日相招雅遊移徐選之酒  
鎗設陰鏗之舞鉞月話方洽燭醉薄酣共賡清吟間作才語指  
物肖形索王筠之十詠辭妍義舉賞劉杳之二贊鄙人黠淺濡  
毫爲記怡神家術偶述樂志之篇振翮天衢莫忘棲山之誌

綠淨園記

夫岩岫高奇則昏旦之氣變林藪深邃則華葉之美殊是以欲構林園必擇名勝劉孝標金華之誌王摩詰輞川之詩石淙丹壑逍遙公之雅游退谷杯湖猗玗子之素翫幽寂澄澹其獨適者已綠淨園者吾友汪紫珊先生之別墅也枕冶山之麓接瓦梁之城江川邇迤舉澤坎鬱樹五楸而表宅編六枳以爲籬仰跳岑之蔚藍俯方池之深翠松杉繞屋薜蘿匝檐離離花明蠶蠶葉厚新雨初霽則一水到門夕景欲頽則諸烟合嶺萬綠如繪七淨布華園之名也殆以此歟先是尊甫芝圃公遠宦逾百粵之地投老築三休之亭竹柏契其冲襟煙霞供其麗矚香分

月竊攀桂海之喬柯冷鑿雲根載鬱林之怪石居鄰慈浦飲汲  
廉泉可謂儒者之風抗希往古君子之澤藻被來今者矣先生  
上承堂構夙嗜緹綱子安標珠樹之聲叔實擅玉潤之譽澹忘  
世味靜耽道腴遂乃緝仲蔚之廬開元詡之逕茱萸不改其舊  
桑柘不耀其華文杏之棟可以棲雲香茅之屋可以賞雨營酒  
槐脯招燕澹之逸軒蚪篆靈想瓊邃古之奇字水竹畱客驚儵  
親人飈餐松烟鶴唳蘿月僊僊乎爭物外之嬉娛忘寰中之棲  
屑焉若夫山眉半黛塢影一枝北牖涼颺西牖朝爽拈花証偈  
則笑語皆香蔭樹垂綸而衣褶盡碧鷗波泛雪花風颺雲烟筱  
千竿露荷萬柄空波無際時聞騷客之吟擊音已遙猶和赧耶



之唱吾師簡齋先生題曰小治浪園之最佳處也是則思話琴  
尊之賞羣雅輔其心靈少文山水之圖萬趣融其神思他日者  
流泉出山將布潤於大野行雲離岫彌增懸於舊林安石登朝  
山澤之儀故在幼興入宦邱壑之韻獨存仕隱雖有分途羣  
原無二致正不必守樂志之篇前遺榮之賦矣某家空四壁室  
質半椽安適軸以忘機甘泥水以自蔽金臺石室游倦之夢終  
虛艾席葭牆買山之資未辦所恃者檳榔合契椒桂同心將躡  
屨以尋君定緘書而招我一觴一詠半葉半花撫笛涼波蓬背  
譜還雲之曲停鐙小閣樽前廣園雪之詞索麝素之古歡訂林  
霞之息壤素節初屆塵襟乍摠迢迢苦岑采采蘭訊撰爲此記

青鳥明之

重修太白墓碑記

夫黃壤埋骨不埋者性靈拱木斂魂不祧者俎豆文采照世椒  
蘭愈芳風節邁倫金石斯壽是以廣川長逝留下馬之陵展季  
不祿有禁樵之壟荒冢三尺高名萬古固無事卒徒之守衛雲  
仍之尸祝也當塗青山太白之墓在焉祠宇頽廢風日穿漏墓  
門久圯藜蒿不翦松檀槐榆霜雪蒼落嘉慶丁卯吾鄉周君琦  
宰斯邑瞻拜祠墓鳩工庀材作之葺之剔之曠如舉如復  
還舊觀寓書於余俾爲之記余惟公之文章鞭撻揚馬公之詩  
篇凌轡鮑謝公之榮遇寶牀華炬公之豪飲千鍾百觚氣足以

貽藉貴勢識足以鑒拔奇傑巨唐有公比漢曼倩長庚英英上  
匹歲星芬耀簡編彪炳史冊萬流其仰茲不可贊也惟是匡廬  
避地夜郎遭斥良爻旅人離光明夷窮途邇迴晚歲屯蹟修鼎  
中自薦之表授枕上手定之簡以至熒熒愛子流浪無歸娉娉  
弱息夷從農伍當傳正表墓裴敬樹碑稽其歲月去公未遠已  
懼封窆之淪圯感雲山之蕭索吁可悲也然而驪山秦市茂陵  
漢隧包九嶼而猶泰錮三泉其未足不數傳而帶劒上邱求羊  
入藏盜出金盃火燒寶衣至於墓直武庫家衆祁連者世異時  
移亦就湮滅惟青山片石巋然獨存代有賢宰爲之修葺騷人  
雅流過而獻弔九原有知差足慰矣公瑰意琦行海懷霞想將

翺翔于八表詎眷戀于一坏迺爲之招以代銘辭曰大江東流  
一拳采石扁舟錦袍千秋此客敬亭嵯峨岩幽壑窅左攀元暉  
右挈賈島囊騎鯨遊逕與鳳嬉明星爲佩仙霞作衣蘿磻泉深  
松門路直靈兮歸來風澄月白

倉山月話記

禽華舒英拒霜始媚倉山亭館秋容怡人蘭卮折簡相邀牽手  
信宿于時重露檐滴疎燈暄明流雲墮衣寸寸涼碧明月入戶  
如來招尋相與促席銜觴留連話舊余甫弱冠卽遊茲山預扶  
風之生徒侍北海之杖履譚譙暇豫賓從稱娖飛騰函珍珠墳  
笙典風雅之盛千載一時三十年閒俯仰如夢素髮垂領重尋

昔遊苔埋手種之花蝸漫曾題之字惟餘泓水舊綠山光古青  
戰揖石丈如摩銅僊偶坐水天對話桑海足使蘿磳咽響後風  
淒聲月如有知光采亦瘦蘭郛奉過庭之訓傳發櫺之書園林  
有主水雲自安文章未墜領袖斯寄謂愜心之事莫如得朋窮  
日之歡不若選夕雪泥蹤迹星萍聚散良會難得烏能無言時  
同宿者袁君湘湄汪君海樹及兒子蘊生湘湄作圖余爲之記

靈芬館記

嘉慶戊辰孟夏某與頻伽先生同寓於西湖詰經精舍神交廿  
年譬盞一旦切肺酌酒傾心論詩於時林雨珣滴湖雲曉涼翠  
漚欲仙萬綠如夢締夏首之新賞拾春餘之墜歡時招逸朋同

之孤權擣笠澤之釣具選柯亭之選材流連浹旬情話彌洽先  
生辯慧君子騷雅俊人韋弦之贄徧於區中淵海之鑿溢于旬  
外猶復禦寇嫁衛伯鸞適越寄蹟苧簡之廬書券不貸之圃家  
公舍人時與爭席販夫義豎難爲卜鄰比來魏塘如獲甯宇依  
桑架棟翫茅作堂橫鶴柴而啟門傍魚龜而築隄神經怪牒積  
疊半牀珠璣置瑤函藏弄萬卷晨餐夕膳廣雅什于蘭陔熙春稟  
秋奉輕軒于護室加以三荆表宅六枳樹籬機雲之屋東西求  
點之山大小伯歌季舞笙簧典墳弟勸兄酬斟酌文史萼跼若  
此樂不可支況有高柔賢婦子廉仁妻蘆簾紙閣青琴雙聲彤  
匳玉臺明鏡儼影有倡隨之樂無苛妒之嫌投畚遺榮賃春偕

隱達士拔俗詩人甘貧吾愛吾廬從其適也昔敬通見抵抒元  
眇之思孝標發憤著同異之論遭骨肉之增軻悲身世之屯蹇  
先生則榮悴不擾其慮得失不概于胸室無勃谿世非鑿柄而  
述馮生之顯志揚屈子之靈芬義取斷章勿泥其旨焉某好聞  
棲遯樂在林藪而無五畝之宅一稜之田張融牽舟孔嵩僦屋  
鄉夢依依鶴猿招我孤蹤泛泛鷺鶩笑人尋文通論隱之書讀  
公理樂志之論不禁申懷之悵惻也

北山旅舍記

余與華秋槎先生投分忘年測交早歲外家羣從劉柳之于士  
安白社比鄰何安之于子慎中更羈宦遂相睽離華顛重逢素

抱如昨北山朝爽西湖夏涼余忝經師之稱君仍寄公之號鼓  
櫓沿溯搗尊過從僂指生平轉瞬疇昔不自知其言之長也當  
夫仲容入宦君卿任俠作參軍而自喜儕筦庫以無嫌畱客上  
關通寶置驛酒坐常滿談辭如雲左驥史媿摻闢龜之音嚴春  
午子發陽阿之倡笙簧煥紙醉金迷此一時也洎乎專城作  
吏牘薦推賢分符象山綰綬臨海彈治豪右拊循流庸班六條  
之政澗溟不波度五施之宜斥鹵胥黜修房豹之風教鹹井回  
甘法虞愿之廉平海石耀彩知言而貫九變談兵而洞三微此  
又一時也旣擢司馬旋望吏議郅漢移病鄧農去官強臺未登  
壯心不已唐休璟練知邊事奚康生熟習兵鈴廼領倉兕之隊



芙蓉山館文鈔

卷一

美

隨水犀之軍韞盾十重戈船三翼當陽武庫樗里智囊幕府目  
爲異才韎韐驚其奇計功因謗掩才與命妨能馴狎浪之黃頭  
莫避燒城之赤舌竟垂迴谿之翅未雪雁門之跡此又一時也  
更事既久徂年易流勁髮漸衰道心澄澹見網蟲而慕隱覩遊  
蟻而娛意苦竹半畝燈火一龕耽玩禽魚寄情于飛泳搜羅泉  
石砥行于清真繞屋龍鱗蒼髯迎客撐空鴨腳白眼閱人小凭  
藤輪偶擲椰栗招提仙梵相隔祇一牛鳴孤嶼寒梅聞呼而雙  
鶴下入清涼之界熏知見之香洎可謂顯不徇功晦不標迹者  
矣茲者煙霞召友風月名兒孔愉卽會稽以爲家盧慈愛靈昌  
而不返朱桃椎兒童盡識韓伯休婦女皆知乞伏臘之酒漿共

雞豚之保社人風淳厚林壑高閒雖故土之難忘覺此鄉之可  
戀某山裝未辦萍蹤尙浮萍張融岸上之舟乏庾信江干之宅  
挹龍山之蒼翠泛蓉渚之淪漣杞菊疏蕪鶴猿悽悵興公未能  
賦遂初太冲何敢反招隱也

瞿花農洞庭泛月圖記

洞庭始波木葉微脫千古惟希逸之賦能傳望舒之神讀之心  
骨清冷毛髮灑淅每欲題五渚之帆縱三湘之櫓也花農先生  
自號漫郎出作散吏騷情蕭澹詩思清深叩舷洞庭擊汰秋月  
于時空水無際長煙乍收太虛四垂如帳碧玉圓珠裹裏素華  
上浮君山空明溼翠欲滴洲小如豆船輕于鳬叢芮瑟瑟不聞

雁鷺之聲斷雲離離似噓魚龍之氣揚舲獨邁不知身之在塵  
世也達心太守孤情絕照淵懷洞賞鍊魄玲闥瑩神冰壺興酣  
作圖水墨俱化靈瑟罷鼓娥簫正寒秘怪恍惚傾耳寂聽廣樂  
振野洪濤股肱以茲畫手儷彼賦心前謝後王並臻神品矣花  
農家本包山宅近林屋吳楚遼濶洞穴潛通金庭玉柱之天左  
神幽虛之府郭景純所謂巴陵地道也茲乘一葉遠凌萬頃孤  
月照影微霜沾衣松醪一尊鐵笛三弄能無觸渺渺之仙心增  
耿耿之離思邪東華薜萑嫩暑未熾涼露滿硯綠陰眠翠冰簟  
風簾展對此卷彷彿月抱流連霞蹤歌碧霜之辭舞玉烟之節  
塵襟頓滌清思忽來灑墨濡毫遂爲之記

小檀藥室讀書圖記

秋白先生偕其友范君小湖查君梅史屠君琴陽戈君積堂讀  
書小檀藥室蒙泉外史作圖梅史爲之贊同時勝流均有題詠  
鍾麟瑞室之頌劉杏林庭之賦遠迹崇情斯足傳已諸君俱負  
英絕之才爲沈研之學林霞助其高致煙墨養其惠心雖經神  
漢聖所業各殊賦手騷情不名一體而丹青勿渝冰雪相照好  
古勵行風義則同夫獨木無繁陰幺絃無逸曲是以異根連于  
椒桂衆音合于笙匏鐵石同氣雲蒸並溼山鐘殊質聲感斯應  
將以觸發神識輔導襟靈行惟比迹誦必共響古人所繇重交  
道慕儔侶也曩在春明與梅史琴陽共數晨夕星闌燭灺促坐

論心每念三君欽欽在抱茲來湖上遂得定交薦瓠班荆提鵬  
擊驚延之企慕曾詠五君青蓮疏放許參六逸生平志願于茲  
一慰而琴陽已入詞館梅史捧檄作令飛沈蹤蹟差池不狎俯  
仰陳事相對慨然況復多雨生魚青苔及榻藜蒿塞逕踴位其  
空良會難常琴尊閒闕余又將著西征之賦續遠遊之篇他日  
傳牋蒼涼雲樹今晨點筆悵悵雪泥離緒塞胸紙窮墨燥屬辭  
不工主臣而已

李松雲先生寫十三經堂記

松雲先生六儒名世五緯在曾早直承明之廬徧覽延閣之籍  
綠鱗丹首發謨觴之秘函玉策金繩守庸成之冊府夢咽丹篆

掌盈墨書班孟堅碩學冠時曾談經於虎觀蔡中郎逸才曠代  
宜濡筆於鴻都俾萬頸胥延庶流其仰而迺辭青瑣之華闥奉  
黃紙之除書十部宣風一麾出守猶復專精勵籍銳意纖細人  
是經神世推學府公旦朝起讀策百篇墨翟南遊載書十乘盧  
牟秘典繼蔡寶書手寫十三經日課五百字正徐遵明之八寸  
策刪秦延君之三萬言無魯魚亥豕之訛絕柳卯桃莢之外雖  
羈旅行役無間濡翰寒暑晦明不忘提槩然燭而驅煙墨撥鐙  
而散綃繻鈔析六書尤工八體署崔儵之室歎詠白娛下延簞  
之帷紛欣獨樂露鈔雪鑿紙約需乎八千月湛日逝歲忽逾乎  
二紀張司業謂讀書不如寫書唐朝請謂寫書宜先正字先生

之於學可謂得其要旨者矣宜寘論堂之壁以爲羣士之宗迺  
金未懸於國門寶僅藏之家衡爰構一堂顏曰寫十三經志勤  
也昔鄭北海有云所好羣書率皆腐敝不得於禮堂寫定傳與  
其人先生迺達略輿蓋考証古今模神睿之微旨暢經通之遠  
旨檠題有耀卷軸常新可以簪纓筆而告天可以執丹漆而隨  
聖緘之金饋疑聞絲竹之聲襲以香緹欲動星辰之色登斯堂  
者不有如遊通德之門侍司農之座者乎某舞堂不入神士蓋  
稱少習蕭奮之專經晚慕始昌之樸學繡鑒畫羽方魁彥以多  
慙書肆說鈴見大師而自失命拙殘思敢獻小言奧義紛綸幸  
近孝先之腹笥謏聞孤陋空攜宣禮之巾箱

大像山佛龕銘

并序

距伏羌城西五里岡巒起伏林岫參差飛岳排雲懸巖蔽景上有石佛像一軀長十許丈相傳宋嘉祐四年所鑿也方耆闍之遠嶽類檀特之高峰霽若遊鷗跼如雕鷲蓮旛珠絡聚七寶以流輝月面星毫極四天而開照俯臨城雉旁帶亭舉清渭環流朱山對峙信塵寰之勝境欲界之淨居矣惟是規模歲遠榱棟年深寶相塵侵金容雨立某官事之暇時遊此山尋隱隣之餘基憫摧殘之落構興言改葺刻日庀材猶慮一簣虧山九仞棄井爰招鄉望共結勝因雨多寶於手中出雙金於掌上遂乃緣山破荊蕀徑披榛檀行雲趨役徒隳至良材天構巨石神鞭疏





果超無上法證同源龍童對立塔象孤蹲真如不動妙相長存

當亭諸烈士贊

乾隆四十九年西陲回匪肆逆始於平涼之海城終嘯聚於鞏昌之石峯堡

天威震誓

王師迅掃未踰三月卽行殲滅而起事之始官兵遷延頗失小利蜂蠆之毒蔓延於東南各郡縣五月十一日鞏屬之通渭陷焉蕞爾伏羌距通僅百餘里賊衆於十八日轉掠入境而編戶之逆又起而應之虺毒潛吹梟風肆扇十雉之城危如累卵某嬰城抵禦凡四晝夜援兵大至虎口僅全而鄒郭之居民被其

焚掠者已不可問矣先是賊將渡渭瀕渭之村落有姚生以甯  
以治率衆鄉民之膽勇者百餘人力與之角俱死於難洎賊臨  
城士民或因罵賊而受戕或因拒敵而投命或被脅不從身罹  
鋒鏑錚錚佼佼不乏其人事定後某採其蹟之才烈者上之部  
府咸旌其閭嗟夫伏固窮鄉僻邑諸人者身未出於閭閻名不  
挂於朝籍而義憤所激慷慨赴死在危而無撓臨難而益奮雖  
古烈士無以加焉豈輕死重義其土俗固然耶蓋見我國家  
德化所被涵濡淪浹有以感激士心之深也聖人有言十室之  
邑必有忠信豈其然乎某身陷重圍幸而獲濟而諸人俱罹其  
厄感悼於懷尤未忍聽其湮沒也爰綜其事實而爲之贊次羌

古當亭縣也概謂之當亭諸烈士云其辭曰

聖神御寓輝烈光燭鑾琤嬰瓊罔不臣服蠹爾逆回自干天戮  
曾未三月巢傾穴覆梟獍誅夷俾無遺育妖謀初搆厥勢實張  
醜類煽熾官師恒懷如火燎原如水潰防既襲滑城克渠益狂  
旋入當亭豕突蠶擁危城岌岌沸聲洶洶攻燿決日死傷連踵  
誰搜其鋒孰挫其勇英英姚生志節高亮同懷共膽義聲先倡  
梁耜爲柵耰耨爲仗投身虎口思扼其吭軀骨可糜風期自壯  
姚以冝以治弟兄均邑武生其所居村在渭之北賊至境二人  
募鄉勇百餘人率先迎關始殺賊十餘人後賊眾大至俱死焉  
李族多才衣冠濟濟興也効節瑗能仗義克威莫遏終然俱焚

李瑗邑貢生李瑗邑監生均以罵賊死

宗揆慷慨儀容偉異修幹豐頤瞭眸巨鼻

賊設甘言啗之以利挺立不撓嘗聲益厲抉面屠腸分骸裂髓

烈烈丈夫令人增氣李宗揆邑之高材生也偉軀骨善屬文賦至誘使降宗揆厲聲罵賊怒解其支特

其死狀汝瑚機僂孝實性成讀禮聖室甯死不懲苦由首碎綴

麻血凝七尺桐棺屹然不毀歿見龍舒庶幾無愧李汝瑚邑諸生時父喪主

室未葬全家俱出避賊汝瑚獨不去賊至欲斷其父棺汝瑚號慟遂遇害而棺以得全父死於茲子死於

孝卓哉二生無慚名教沈綿牀蓐寂寥蓬蠶蟻賊縱橫肆其劫

剽鋒刃俱懼沈寃誰吊李敦基邑監生子于桂賊至時敦基病于桂侍湯藥在側賊以刃脅于桂去于

桂抱父大慟賊併害之宋子翩翩居然佳俠英姿颯爽輕身趨捷豺狼塞

野身為偵謀呼告守陣爾氣無懾攀登未上羣寇潛躡首隕短

戈魂依危堞宋建都邑諸生有膽智賦渡渭時生趨城下告賊至狀且謂守者曰賊來無多爾等不必恐語未終

而賊大至遂於城下被害韋生殉義爰在耄年彭子捐軀亦已華顛履尾蹈

刃神色恬然誰其羸老似此貞堅

韋文蔚彭耀千並邑諸生時年八十餘彭年七十矣賊

至由牛壽以大義賊怒俱害之

矯矯不羣我思二謫一呼奮臂百夫悲陀格鬪

荒墟相持終夜力絀志伸青燐俱化

前陞登諸威甯並邑諸生率鄉勇與賊角俱死焉

將生憤發氣湧如山丹心所激有壯無孱竟思徒手縛彼寇頑

倉黃遘難委骨榛營

賊已潰河生員蔣德鈞僅率十數人抗之為所殺

古亦有言烈士

殉名詎以資格而分重輕黃冠羽客秉翟儒生疇為小吏孰是

編氓沸湯爭濯狂刃甘嬰事誠足紀義並堪旌

時有道士蔣來俊附生王文會

梁州晉吏員劉名世民人謝敷教謝應元馬居仲均以壯賊死焉

聖澤履鴻邊氓淪浹誰謂

花門不知大節闔室雉經舍家灰滅視死如歸不為威惕琨玉

芙蓉山館文鈔卷一

三

秋霜嗚呼比潔

周氏馬子成以罵賊死馬呈瑞聞賊至恐被殺令其妻子自焚隨焚其屋廬投火死馬光漢亦

以罵賊被殺

天討奮揚聲靈遠布蕩滌羣醜如風掃霧城郭依然

室廬如故營魂返宅暴骸歸墓凡爾國殤應無怨怒我之懷矣  
同罹危苦拊心念往慙慙如覩撫爾遺蹤垂之竹素

黃孝子贊

孝子名機字聖貺太倉州鎮洋縣人

江夏黃童世敦穆行淵哉孝子幼秉至性父有力役跳往代之  
手足鱗皴不言瘁而靈根早隕偏親是特爲謁三醫重趼百里  
承顏暮景篤疾沈綿刺血籲天衰齡再延蕭蕭聖廬窳劣未安  
比隣不戒忽有訛火遶棺號呼精感祝融迴命吳回爲之返風  
百年荼苦終身直斬苦由骨立莠蒿色慘玉無掩輝蘭無沈馨

爲世矜式貽親令名枯魚索鱖音容永慕投筆心摧鮮民之哀

唐孝女贊

孝女名素邑人居惠山之墟塢工畫花卉有徐黃標格密畫養其父母終身不字余丁卯年居

憂旋里見之年七十一矣

卓哉孝女繼嬰兒子撒環捐璜終身不字晨夕丹青以供旨甘  
一女承歡逾千百男冰雪寒闥蒼涼粉墨中含古春天地正色  
誰言香界衆卉紛葩我歌笙詩粲粲白華百年孺慕茹荼匪苦  
仰看白雲淚落入土鍾繡不逮哀哀鮮民椎心自傷有媿斯人



英蓉山館文鈔卷一

芙蓉山館文鈔卷二

金匱楊芳燦蓉裳著

上彭雲楣師啟

按金衡而調音律清濁不得相濟握璣鏡以鑒娥媼妍醜於焉  
立判豈有宮懸十二啞鐘早受撻撞粉黛三千癭女偏勞刻畫  
是蓋非常知遇夙有根因拈花梵殿曾參金粟如來徹席緇林  
早侍儒童菩薩一介預蘭臺之聚三年陪藝苑之遊憫投懷之  
窮鳥假以羽毛解銜索之枯魚貸之升斗顧盼則榮於尺錦咳  
唾則重若連城譬大鈞之塊土無垠而小草之涵濡獨厚伏惟  
夫子詞壇圭臬翰苑夔龍通百氏之津梁挾九流之鈐鍵八章

作頌知吉甫爲古詩人再拜麝歌識庭堅是真才子凡夫壁誥  
威書之策綠鱗丹首之文羽陵百軸之遺金版六發之舊莫不  
十行俱下一過不忘宜乎摘詞而銀湧金鳴落筆而鳳跄鸞奮  
矣猶復搜才路廣揖客門寬倒屣而接詞人束帶而迎縫掖經  
郭泰之品題茅容望重受裴頠之識拔夏少名高譽人不吝其  
齒牙說士更甘於肉食桃李盈前還登橘柚檣南在御不棄蓬  
麻卽如某者南國之鄙人也鹿鹿何奇狙狙有志誓鈍實肅膏  
之性波擣乃撈散之材未吞夢鳥之一壺敢竊神人之雙筆問  
藻廉而不對詔廳鼠以茫然高齋樹義誰云畏此後生弱冠迎  
賓爭笑是何年少沉平早歲單寒窮年坎壈街頭販鐵市上備

書無他志略班華空投未遇知音陳琴欲碎青雲路杳紫髯哀  
經半年鵲鵲不過貞簡之廬一斛檳榔忍飽彥昇之腹鵲鼻雕  
肩之骨相鼠污鶉結之冠巾陋若徐摛弱同王粲每邀遊其有  
願思干謁以無媒淋漓七紙敢誇倚馬之才迢遞三門宜絕登  
龍之想然自一登蓮府之餘兩拜月題而後公每煦之愛日浴  
以清波揚仲容之佳譽許以無雙愛孝綽之清才還他第一識  
王公孫於綺歲願舊籍悉以相貽賞袁郎子於髫齡謂博士已  
堪見代牛心割炙墮尾交談因而得泛文淵遂窺藻府園令上  
凌雲之賦賜鎡百金佐公進石闕之銘寶縑千匹公每強之評  
論借以傳鈔

公以進呈欲頌既  
消化閣補賦見示

欲知古事每問仲舒偶得精文

定呼子慎元言不倦神契殊深斯真與不御岑味能茹縵飾  
馬以鞶纓七就寶燕石以緹繒十重在人則驚以爲奇而公且  
愛忘其醜茲繕舊作詩文若干首謹封如別鄙言累牘江東號  
曰癡符僻字盤囊都下嗤其澀體冀文星之朗照希巖電之流  
輝倘郊居十詠獲見賞於東陽宮體一篇免遭訶於北海則雖  
追氣泰山添年斗極未足方斯盛德譬此殊恩日者九花虬遠  
千仞騰遙執丹漆而暫奉光塵詠鱗鮐而還瞻黼黻此至見元  
魯山應無他恨於人得歐陽子便謂奇觀今晨尺鯉好乘江上  
之潮他日雙鳬誓立門前之雪千祈以屢戰悚增深

再上雲楣師啟

載別旌門屢更冀渠波駸雨滯奉清塵以無因魚愕雞睨負深  
恩而若悸長安路遠日下雲高空結徊皇未能忘弭狼當獻歲  
獲聆好音知夫子忠簡 帝心揆閱 睿鑒代工天府燦台曜  
於紫宸奉職冬官耀文光於華省戟架有烏翔之兆綬笥徵螭  
繞之祥榮問遙傳欣忭何已次第揆承盼昧之榮許絲蘿之附  
不嫌寒賤遂締婚媾才慙逸少公然坦腹東牀學遜延明竟爾  
奮衣上座束鶴裝而隨鷁舫曳鶉衣而侍鱣堂某因敢以愚衷  
達之鈞聽揆蹉跎失學懦鈍無才纔識妃豸初分甄益茲得進  
窺文囿日侍宗工展香緘綵襪之書問瓊釵金鏤之字伏望憐  
其寡敏破厥愚蒙庶珠璣漱澹分餘沫於潘江翠鑷煒煌擷寸

絲於朱錦加。以才同品陋。學其家貧囊。篋蕭條資。裝寒薄。以支  
離之骨。相著了鳥之冠巾。任西華貢薪郭北。惟曳練裘韓康伯。  
熨火懷中未成布。裨燕臺雪厚朔塞風高。短褐何以禦寒。敝裘  
豈能度歲。儻得賜之文扇。覆以綈袍。割氈席於江郎。解絮衣於  
顧協。如焚穗之歸甘露。何處非恩。似桃李之仰青陽。無言可謝。  
此某之所仰冀於公者也。每念於陵子慎。兩小齊肩。仲海季江。  
十年共被。富開花落葉。早雁初鷺。或斑管分題。或蠻牋對壁。一  
旦束裝欲去。把酒言離。輕車其載。不隨康樂。還都老屋。同居翻  
遣清河赴洛。詠夜雨連牀之句。和春流北渚之章。行矣銷魂。潛  
然落淚。所恃者戴恩隆重。託地崇高。王逵訪璞之人。桂入搜香。

之藪纔欣中崔便擬登龍宇李朔以兄子依然舊日門生愛盧  
肇是文人取作高閣嬌婿公之意厚矣公之德大矣某甯匪人  
有不鏤膺鉅膺者乎日者樞樞寂處蓬戶索居灰心久寒蒲姿  
易改更冀曲逮恩光分河潤於東里襲承導引借雲棲以南枝  
輕觸威嚴不遑流汗

上朱笥河師啟

蓋聞屯雲醺霧發揚龍豹之輝駭浪衝鼙鼓舞鷗鵬之勢良工  
鐫琢則虹玉離巖大匠埏鎔則星鐔出冶於以驪鱗奮翌絢彩  
飛芒苟無憑藉之資甯免湮沈之歎是以羊陟周旋於趙壹劉  
惔賞鑒於張憑蔡仲郎寫公叔之書任敬子誦陸倕之賦斯並



一經題品便越儕流吹噓揚竹素之芬顧盼感風雲之氣者矣  
亦有風期舛午心迹差池如荷戟以入榛異處囊而脫穎絳帳  
尊嚴三年不見諺門迢遞一眄何期屈延明於馬廐之中坐季  
寶於牛衣之上甚且愛思道而排勣祖重班固而薄崔駰文章  
之投契何常知己之遭逢不易初未有聞薰識桂嗅氣知金飛  
耳而納虛聲樹頰而延佳譽如公之於某者也閣下瑤躔降彩  
銑社抽英領著作於蘭臺典圖書於鶴籥經神學府紛綸撮馬  
鄭之標辯固詞宗盤礴吐淵雲之思凡夫羽陵落簡汲冢遺編  
龍威靈寶之書昌僕彤魚之譜莫不胸開冊府手握靈珠易中  
九事營輅皆明帝後七車張寬獨坐宜乎庶流仰鏡羣士欽風

矣某引絙頑姿挈瓶小智劉瓛命蹇光逸門寒乞食路窮謀生  
計短烏困雕陵之彈舟沈破冢之風固已分作散材甘爲餓隸  
惟是靈根未夭結習難忘雕畫奇辭丹黃稗說發簡而擿經三  
折燃燭而燼有數升黃頭作字惟乞漿壺仁軌屬文帆書空地  
發哀唱於斷竹焦桐之下拾殘編於補袍覆醬之餘敢云架學  
飛才差用礪鉛摩鈍猶記少從儕輩逃聽風聲知閣下玉尺按  
才冰衡鑒物揖賓朋於上席拔奇畯於單門竊幸與北海同時  
歐陽並世所恨仙凡迥隔流品相懸公遠於天愚卑如地縱復  
三霄露渥不潤枯荻九仞風高難扶弱羽將與腐芥曲鍼而並  
棄安望丹砂玉札以兼收不圖弟某猥以庸音上塵清聽因垂

緒論曲獎燕詞逢子慎而必問黔婁得僧彌而難忘法護孺子  
何知早奉康成馨欬微生多幸更邀許劭題評不待趨塵甯須  
識面身猶泥滓名已煙霄澡盤鳴處竟諧龍笛之聲布鼓搥來  
遙答鱗皮之響此某所以撫臆知恩循涯自愧者也所冀廣桑  
山上不昧夙因通德門前可希後會幸厠鄒枚末座願陪籍湜  
班行三尺之素方傳一瓣之香有屬輕干威重曷任兢惶

附復書

向從仲則處得讀足下駢體文以爲初唐四子之風於今  
再覩趣博語重鬱爲通人今茲可存他年可傳無遺憾也  
但惜無由接晤惟往來於心不能去耳頃從令弟荔裳處

接手書讀之浩乎煥然若江河之決虹蜺之興也蓋太息者久之惟稱許過情僕非敢當柳州之爲衆人師且不可足下何待之非分耶慙愧慙愧辱厚意惟相與勗勵以諸經註疏爲根柢以百家撰著爲枝葉知作者之意極文字之能凌雲雕龍不足盡也惟賢者能辨識之

謝法梧門侍講集序啟

日者高軒枉過未遂趨承鉅製寵頒過蒙獎飾如舒麗錦似握美瑤三棘六異襲以緹紉十色九光耀於几席心期坐台風雨之感魚龍景氣潛通磁魄之收鍼芥夙生多幸三復增慚伏惟閣下文籍先生風騷宗主含香日近珥筆霞高玉緯瓊綱發謨

觴之秘笈神經怪牒探宛委之藏書蘇廷碩之制詞有同宿構  
馬賓王之掌故若所素諳癖嗜清吟獨抒妙緒幼與位置有邱  
壑間情摩詰篇章是人天外想鶴裝煙駕時人目以仙才靈石  
雲和識者比之天樂可謂兼衆妙而成能挹羣言而高視者矣  
猶復搜才路廣愛士情殷選异材於高選之亭識良驥於冥零  
之坂愛裴裳之句報以錦綉得陳遵之書弄之篋笥宜乎庶流  
仰止衆譽歸高如遊鱗之赴溟渤迅羽之爭翳蒼也某樗櫟凡  
材孤蘆蕞品少歲攻文敢誇狸狌中年入仕有愧雞廉董方下  
第撤席而試明經趙壹窮途斃褐而隨計吏文章得利不過齒  
舌之閒竿牘疲精久頓風塵之下心已同於冰子迹迴瀾於山

郎客髮蕭衰學殖荒落無裒遺之驚志如師丹之善忘偶以暇  
時自甄舊作鼓鑠輅缶唱挈輪轅叢雲之辭未工防露之音不  
雅恐屈轂之瓠難爲五石大樽梧臺之石空費十重革甌然而  
一詠一吟難忘結習九總五總猶冀晚研閒窺大雅之牕藩竊  
証少陵之宗旨一傳而有玉溪之適麗再變而爲山谷之清剛  
分甯之逸軌匪遙懷縣之風流如昨私心向往實在於斯拙手  
追摹無能爲役茲荷良工識曲真實察微略其元黃辨其甘苦  
以此時之印可定他日之依歸王長史有言劉君知我勝我自  
知斯之謂矣盼睠所及敦洽變於陽文題品偶加瓦釜重於岑  
鼎感惟鏤腑言不宣心

答阮芸臺中丞啟

前歲與衛在都感蒙過訪懷刺報謁未奉光塵景仰私忱欽欽  
在抱復荷示之鉅製惠以琅書探宛委之藏發謨觴之秘經神  
學府則殷陸扶輪辯囿詞宗則淵雲承蓋猥以汎剽妄測湛深  
編摩積年神誌形茹閣下文惟天授才爲世出藝林哲匠康時  
寶臣抱醅鬯之心數塞晏之化鳩扈率職澤覃耕桑鯁鯁形  
波靜溟澗絳闕倚重蒼生仰流廻復愛士情殷拔才路廣含  
經味道之士懷鉛挾槩之生入學舍而橫經登禮堂而寫簡咳  
唾所及不數顧厨陶鞿之餘猶成曹陸秣繼鯁冠流談若海綳  
聯綠牒著錄如雲海內龍門舍公誰屬弟揆早邀英盼得託素

交稟命不融中年遽隕閣下古道盛心綢繆備至朱季致贈卹  
張堪之孤子明緘書求李賀之集念其慧業工文癖性耽句弱  
齡羈宦壯歲從戎歷繩行沙度之鄉供炊矛磨盾之役境極險  
塞詩亦經奇茲術藏紀事二卷同少作已付剗剗尙有苗疆蘭  
州詩並遺文共四卷俟梓成續寄幸藉品題俾傳不朽感何如  
之某材既凡庸識更樸昧偶撫瓿缶獨倡揚莠胡叟才拙時自  
鄙言鮑昭思竭尤多累句補袍覆醬無可觀采茲承來命不敢  
自匿謹封如別仰酬褒誘貴門生陳君文述曠代逸才揚班儔  
也在都與某爲文字至契敬肅燕函屬其轉達輕干清重曷任  
兢惶



辭阮芸臺中丞啟

自愧輅材得親大雅凌門夙企備蒙知顧之殷篤節初臨卽荷  
招延之德爲劉瓛立檀栢之館俾周續校馬隊之經喜賓從之  
雍容追陪曩展值籌謀之清暇嘯咏湖山方期受簡禮堂應劭  
甘居北面詎意驅車函谷潘生遽賦西征緣淺自憐感深難別  
迴復分之清俸潤以廉泉解推之意愈深銘荷之情曷極敬惟  
閣下茵馮集慶繡黼增華碧海恬青矚歲稔翹瞻紫戟忭頌  
良殷別後於月之十二日抵錫綠秋暑隆熾稍事遷延定於七  
月初四日束裝赴陝長飢驅我垂老依人能無懷土之情彌切  
慕徒之戀依光日久思德滋深清暉在望祝卿月之常圓寸念

遄飛與嶽雲而其遠度布謝忱伏祈垂鑒

復袁簡齋師書

獻歲發春猥辱教命適以身負重憂微命如紙作報未聞思德  
滋深望南雲而引領蒙東雨以搖心空結回皇未能忘弭自惟  
譴劣久荷幘幪屢有緒言長其佳譽雖川波遙隔而鱗札時通  
善誘之誠溢於楮墨念孝標之篤學憐元叔之奇窮不圖磁石  
竟受曲鍼豈意獲人能收瘕木此君山所以歎神交佐公之所  
以感知己也去歲疊犯靈祇招延禍罰痛閔凶之早遘爲孤露  
之餘生號叫無聞肝心欲殞誠不難殉龍舒而入地效皋魚以  
沈波而衰族少丁小人有母偷延視息苟鄒光陰僦居蓬蒿甘

爲難保之傭隱作漆工誰識高門之子良可哀也尙何言哉方  
秋英才登足俊賢驥首而某市中鬻布郭北擔薪棄傳介子之  
觚燒崔君苗之硯心如槁木形類寒蟬樊閒窮鳥仰觀勁翮之  
翔峽畔沈川靜聽驚颿之過著五悲之些投萬憤之詞未嘗不  
仰天椎膺泣盡繼之以血也顧惟不肖碌碌無所短長刻鵠下  
才雕蟲末藝瑣碎同於綫縷繁猥譬之米鹽又不能流麥下帷  
棄竿投斧困以憂患迫於飢寒拾餘唾於夢中丐殘膏於席上  
庾信則譏爲驢犬陸雲則譬以猪羊情泛不專言浮妨要備聞  
明訓敬以鏤膺矣頃知儼體已付雕工輝重錦於藝林懸珥玉  
於都市望采者精墮聞風者意移某也狂愚竊思學步豈敢以

厖涼鬪華袞鉛刀齒步光哉特以入鍼神之室雖拙女亦解鉤  
描遊匠石之門雖賤工亦知雕斲儻敢瑤槭賜之縹帙是所望  
也再唐初王楊燕許諸集亦所購一二見賜蔡中郎枕中之秘  
悉付仲宣沈尙書架上之珍盡歸元禮某之薄德敢附古人公  
也雅懷實追前彥以茲瑣屑上瀆尊嚴死罪死罪頃白藏司秋  
素鍾屈序想攝衛惟宜興居多福雲飛泥滯奉譚譙以無因魚  
鴈雁沈盼箋緡而不至昔日綴王盧之末曾造高軒何年陪彭  
戴之班還沾卮酒投觚隕涕臨楮馳神

寄袁簡齋師書

自違謨言倏易星霜龍門天際翹首云勞稔復川路迢隔箋緡

莫因懷戀舊恩積思成疾敬惟福履康娛與時恬暢莊園枕史  
激流植援補汜勝之書和淵明之集寓賞物外索解元中竊想  
起居歆羨何已某以不才素蒙賞愛追隨杖屨動輒彌旬每憶  
黼筵夕張華燈明檉竹露滴酒荷風入衣靜聆緒言仰和高詠  
自謂此樂千載一時陳思桂苑之遊任昉蘭臺之聚無以加也  
何圖良會星乖芳訊雨絕遠遊漂搖岐路鳴邑歷秦關隴坂之  
險從皁衣黑綬之役自獻歲首路暮春解鞍尋復西抵流沙東  
窮洮水奉檄何喜折腰自慙重以才性凡庸時形短拙弱躬歛  
手仙仙俛眉航漿衝齋旣違其宜堂養雨萎罕適於用常恥以  
脂膏潤已不敢以琅瑯傲人內手捫心進退維谷邇來文字結

習猶尙纏綿然恐日遠日疏性靈坐天潢汗一勺而易竭驚馬  
十駕而中疲尙冀時賜裁成曲加提策則首戴公恩更無涯涘  
與黃仲則書

某白自別光儀甚相思想不見叔度鄙吝日增古人云然殆不  
謬也前在蘭陵與諸君寒牖翦燭商略文藝弟時負重憂戚然  
不怡及恩恩返棹孤坐蓬廬藜蒿塞門徑無行者追憶曩時聚  
首又邈若夢中不禁淚之淫淫承睫也昨以不棄示之緒言惟  
誦再三心折久矣雲蒸龍變蚪翔鸞躍希世寶也希世之寶當  
爲世秘之惜之夫貧簞之子藏燕石者什襲享敝帚者千金此  
矜惜之過也若陶朱猗頓之家槌夜光碎結綠則暴殄之過爲

尤甚竊見足下有所撰作略無留手而倦於裏錄弟私以爲過  
矣又嘗論人之聰明才力當用其所長掩其所短與其博而不  
精毋甯嚴而不濫譬如首路者裹餼糧整車騎雖崑崙流沙之  
遠循途刻日可至也若朝思登崑崙夕欲泛洞庭吾恐願奢志  
紛終至白首鄉閭耳古人遺集奚翅百數談六藝說五經陳言  
累累盈紉溢縹後人視之惛然欲睡以塞鼠穴供蠶糧矣向亦  
鏤心刻骨求其可傳乃今如是悲夫詞賦小道然非殫畢生之  
力不能工也而好高者往往失之子建旣小辯破言子雲復老  
不曉事強思畫虎故薄雕蟲願足下勿爲所誤幸甚弟窮愁轉  
軻萬緣都廢惟文史結習未能去懷日來窺班范之鉅製仿徐

庾之瑋詞銖積寸累自謂有得然真賞殆絕知音者稀張率之  
詩云沈約則句句嗟稱慶虬之賦託相如則篇篇傳寫庸流之  
人貴耳賤目依古有然何足怪也想攝衛惟宜眠食增勝茲因  
風便敢獻狂言

與張仲雅書

長離善舞焦明必按拍而歌應龍好飛鷗吻輒憑虛而望瓠巴  
鼓瑟而遊魚聽師曠調琴而元鶴翔是皆景氣潛通心靈默會  
物猶易感人豈無情所以聲華相慕孝穆投箋於李那風器不  
凡叔夜測交於趙至何必垂髮齊年撫壘而遊始謂之知己耶  
今秋於家舅氏處敬析名作玉象銀鈎珠胎鼎氣何郎得意霞



朝霧夕之篇鮑子知名別葉歸華之句熒燿耀彩龍茲華觀之  
森陳曲折通幽樾銀疏房之架構可謂美矣可謂麗矣夫漢樂  
唐詩詞裁互異吳歈越豔興旨相通苟非淹雅之才難語諧聲  
之妙迺者古音易濫真賞殆稀眠挺者喜爲神禪之詞嚮牙者  
不識瑰奇之製五色鸞章空資裸壤八銖鵲鏡徒覆盲卮寡識  
則狐認爲蒼多怪則馬驚其腫緣茲憤懣歷有歲年豈意今辰  
遂逢作者載觀高製快極生平披月幌以長吟對風軒而細寫  
蘭芷充幃擷芳華而惜慨絃歌赴節顧流水以移情千里神交  
九回腸轉不自知其一往而深也某童子蟲雕辯人狸別結習  
未忘夫翰墨夙好祇在乎詞章揚雲綺歲早傳靈節之銘任昉

髻齡便有月儀之製雖備經屯阨而不輟呻吟譬之鉗射稽之  
口不忘謳也羣獲人之手不忘斲也茲者繕爲行卷呈之典籤  
過雷門而布鼓無聲投珠海而小璣失色倘不訶爲涇體諒以  
癡符幸矣所恨川波迴隔抵掌莫因好命趾離明指夢中之路  
先呼慶忌緩通江上之書行看朱鼈之浮仁望青鷺之報

寄方子雲書

判別以來忽忽半載江皋隴坂相去邈絕每一念及離腸九回  
邊地蕭寒秋飈已勁朔雁遑唳悲笳亂吟念舊日之南枝悔昨  
年之西笑中夜起坐淚如縷縻某以謫才得託神契傾心倒意  
七載於茲猶記桴舟桃葉之渡躡屐雨花之岡美酒十千涼月

三五才俊盈座筆墨橫陳歌呼相娛嘲謔間作方謂古歡易索  
良會可常何圖一別邈若墜雨邛遐想足下起居康娛著作日  
富飫領靜趣殊勝勞人惟空釜生魚青苔及榻寂寞之況近復  
何似達人耐貧君子安雅是瑣屑者諒不以置念也某獻歲東  
裝暮春弭節尋復西窮弱水東抵臨洮僂指半年滿足萬里來  
嘗不覽山川之雄奇觀雲物之瓌麗悲英豪之蕪沒慨陵谷之  
遷貿思託詩歌以放懷抱無如性靈坐天煙墨久疏始歎江山  
之助人不敵風塵之困我也南園瘦人近況何如念之殊切凡  
我舊好幸俱致相思搦管操觚可勝悽咽儻逢風便幸惠書音

與華湘屏書

籍甚清徽久深延伫猥蒙不棄惠以良書伸紙發函歡喜無量  
惟揄揚過當君子失辭雖前再三伏增慙慙某少歲狂愚竊不  
自量綴奇辭而繡悅誇末技於雕蟲實習結之難忘匪偏人之  
自驕積年既久篇什遂多總未能遠溯淵源深探根柢同膏馨  
之不實譬蒸聚之徒華知未窺大雅之藩籬詎足挂通儒之齒  
頰自謀升斗早歷風塵簿領沈迷朱墨填委胸臆糾結張敞自  
謂無奇吏道迫促陳咸因之憤積鋒穎日退縑緗久疎加以精  
力易疲髮容難待卽偶有述造亦不堪就質當世矣閣下以婣  
雅之才爲通博之學方當校秘文於冊府奏遙響於鈞天迺苦  
惜同岑菱憐其嗜遠垂緒論曲獎蕪音恐貽君以寶璞之璣益

滋我以享帶之惑方今隴雁送秋臯鶴警露木葉欲脫邊草已黃訟庭稍暇書帷寂然唱古寡和呼令莫應我懷伊人渺在天末何時得促膝論文慰生平之衷懷乎神交識路蘭訛可通後有幾緡祈申昆季前書謙退未略形骸轉令懷慚殊乖素願茲書代面臨楮馳神某再拜

答趙良甫書

良甫足下前奉贈言敬析名作發函伸紙歡喜無量風藻黠發天才拔張五音繁會簡子魂驚九光徘徊安豐目眴范史事外殊有遺致庾郎胸中故無宿物出入懷袖恍如覩面紙敝墨渝諷覽無輟情文兼摯辱郎君之謙下掄揚過當恐君子之失辭

中心欽欽以感以愧僕少好辭章頗自鏤礪殫精圖史顧情典  
墳託豪素以抒懷撫瓴缶而發唱庸音自效結習所存如鼃鼃  
之甘烟若蠖蛸之赴溼或歌或嘍一詠一吟希掉鞅於文壇庶  
繼組於作者無如人事煎熬家累驅迫竊升斗之祿爲風波之  
民邊障十年羈宦萬里堙腐性靈疲頓竿牘偶有撰述輒自慙  
陋深藏篋笥不欲示人志業蹉跎光陰遷貿茲復倦爲塵吏甘  
作山郎筋驚肉緩不利走趨心頑質堅偏好冥默屬文多骯骯  
之習富官有蕭杌之稱推排已久覺老物之可憎揜抑自傷知  
盛年之不再王微之宦情本淡江革之僻疾難瘳時恐急景凋  
顏牢愁驅壽思欲返芰荷之初製踐猿鶴之舊盟而塵累尙牽

山裝未辨脊言疇昔彌用疚懷兼之京華知舊意緒寥落天涯  
偷好蹤迹睽闊捥管無侶舉觴莫屬春寒陰陰獨坐閒館輕塵  
盈几飛鳥窺戶管甯榻破向榻牀空我懷云勞不可說也足下  
馳俊譽於早歲揚采烈於名區青萍結綠望氣者知貴濫觴號  
鐘知音者競賞含香漸越蜚聲日遠方當雍容臺省翔步雲霞  
道直途清相見或易藉得挹注宏抱雪滌素懷政予望之心乎  
愛矣川途間隔久遲作報茲乘風便聊布夙心

答楊米人書

夙耳聲華時深欽挹偶因良會得預勝流識騶屈之微言覓孟  
嘉於廣坐清談似玉藹抱如春椒桂氣連槐榆韻合流連晷刻

藻暢襟靈得賢友等於次福獲師資侔於至寶珍逾六棘獎動  
七情方幸盍簪俄成分齋潔雲蔽岫駛雪壓岑聽藥水而興懷  
折疏麻以軫念綢繆雅契寤寐宏襟盲念音徽良增戀繆每擬  
虔通牋絮略述胸懷而俗物填厖塵緣囂滓託雙鱗而有待呼  
子墨而未遑抒軸於心迴環在抱辱承英盼先損良書珠字九  
光珎章五色豐辭麗密妙旨纏綿伸紙發函色飛神舞重荷掄  
揚失常謙抑過情雖客遇龐公易邀嘉獎文如謝閣姑予佳評  
而爲混沌瞽眉蒙俱借而循環周誦倍益悚惶承示盛作如讀  
異書七寶成文八琅競響思通機妙才擅淵英不遺理而課言  
乃緣情而立則雅而能整博而不窮鉅海汭汭自昇汀瀆之水



和琴采采知非箏篴之聲洵可謂結瑤搗瑤經奇緯麗者矣夫  
末流益縱大雅云遙單慧師心儼才貴耳或務爲崛奇崇浮夸  
之製或囿於拘鋏尙神禪之辭苟非高挹羣言豈能力追正始  
伏觀尊著獨暢元風雅聲遠姚輅才卻步吾宗著作代有聞人  
盈川擅博麗之稱少尹負宏通之譽宋初格調首倡西崑元季  
才名爭推老鐵文章未墜非閣下其誰嗣響哉某性惟櫛昧學  
愧淹該甯燂掌而讀書徒折腰而負米繼綴纔綰縉衣易緇枯  
官廿年榆塞萬里低首風塵之下疲精竿牘之內薄植早落恩  
聞日稀雖復耽結習而屬詞效庸音以足山而荒微之人文寥  
落故鄉之親舊聯遑空唱古而呼今難搜述而索耦夔雙脛而

蹠蹠鶴孤喙而噤吟獨學寡聞冥行失道類荃蓀之化艾等蘭  
槐之漑漑日月其除光陰易邁惻然憫落儻爾髮凋一吟一詠  
從可知矣此所以驚蹇之乘自羞見伯樂而嘶聲缺齧之劍未  
敢遇風胡而淬鏑也而閣下顧喜聞槌鑿樂聽銑缶拾荒亭之  
爨竹收古井之墜釵倒饌何辭披牋知感謹寄上舊詩一冊品  
異參苓空邀采劘質同瓦礫終愧弄藏尙望箴規指其疵考相  
去匪遠良晤何時室邇人遐波駁雨滯所望鹿麀覲闕鶴駕  
過都斟宿醞於烟晨翦春鐙於雨夜雜花著樹攜蠻榼而待君  
時鳥變聲抱清琴而訪我會言近止不其樂乎聊報瑤章書不  
盡意

與兄永叔書

猥惠良書用蠲疾首知兄已解鞍幕府弭節錦城經行五旬得  
詩百首抗勞商之古調變華羽之南音策馬晨征記蛇鳥庚丁  
之陣懸車夜度上蠶鳧子午之天瞿塘波浪湧現臺端棧閣風  
煙盤旋腕下必有奇音震物異氣驚人惜不卽寄我一緇藏之  
什襲也重惠苦言閒聆高論驅使草木比喻詞章莊生放誕雅  
善寓言適于滑稽喜爲庾語識異蕊奇花之不殊散木知華詞  
麗句之無當清裁研研之論確矣超超之悟神矣然揆余懷抱  
頗有異同夫朱義啟曜九枝揚若木之華黃河始流五色絢崑  
邱之派搆雲屋而虹梁煥彩鼓洪鑪而赤堊飛芒豐貂隱豹之

珍其文蔚也粹羽明璣之貴其采鮮也地非裸壤甯有棄綺繡而弗陳人異哀駘孰肯卻鉛華而不御如必欲易縑緇以結繩返輪轅爲椎輅有不令見者口呿聞者舌繹乎若謂玩物者易溺性靈負才者必隣浮薄是又鄙儒之過論而非達士之知言何則陳思代馬之篇王粲飛鸞之製陸士衡之揀金積玉徐孝穆之列堞明霞並杼柚清英激揚鍾律苟高奇而有骨卽連牝以何傷而世乃有學昧鼠抵經談狗曲早已斥詞章爲末技薄藻翰爲駢枝如吳邁遠之凌轢古人同劉季緒之詆訶作者有是哉俗士之披猖更甚於才人之躁脫也且夫蹄涔水淺豈能容橫海之修鱗魁父邱卑安得產凌霄之建木自古文人之表

其必由大地之鍾靈故哀江夢渚之奇爰生景宋并絡天彭之  
險特秀淵雲而吾鄉自六代以還三唐而降雖清詞麗句不絕  
於時而亮節驚才罕聞於世弟所以仰山川而怫鬱發緜縠以  
歛歔櫟挺獨前恢奇自恣窮搜蠶簡三千鄴架之函廣集咫尺  
八十陶家之甕所慮者陸雲貧儉謝客空疏思多而過眼即忘  
氣銳而經時輒輟有乖通聞無解蚩儒耳至若脂粉調言元黃  
稗說習虔儼之語工側豔之詞大言伴侶誤陽五是賢人百首  
比紅目羅虬爲才子篇章細碎音響妖浮末由犯我筆端早已  
置之牀下固不必爲弟過慮也嗟乎入世寡諧知音難得白兄  
行役久不作詩蓋以目矐方隅身淹區里不足以馳驅烟墨嘯

陀宮商抑綠境過臈軻生涯寥落牧承宮之豕護高鳳之雞折  
菱燐枯槁鹽敗米落紙而飛揚氣少發唱而寒乞聲多手未柔  
而且韜射虎之弓牘將絕而莫舉函牛之鼎待崔岐叔讀書五  
千卷王元偉閣筆三十年此時倚馬千言必且加人一等兄以  
爲然乎否耶方今白藏紀序朱律謝期想攝衛惟宜興居多豫  
但望數行時標蘭訊莫教萬里久斷魚緘以休連敘意之詩當  
子雲解嘲之作扁函削札一笑臨風

與張子白書

握別以來屢易寒暑人事推遷境遇遘蹇隔關相思發於寤寐  
獨居邑邑淒泣彌襟側聞閣下始有遷擢之喜繼有帷帳之悼

江淹之落入室潘岳之簞竟牀感念賢儷提攜弱女丐沐仰飭  
觸緒增慨君本多情何以堪此所望以禮制悲排愁破涕不必  
效蒙莊之達亦無庸如奉倩之傷也某于去秋九月在都奉先  
慈之諱十月中旬倉皇就道麻衣披星野飯餐雪塗路雖難提  
挈細弱資斧乏絕到處滯留臘月初旬始抵金陵苦次獻歲回  
無錫舊居屈指離家三十餘年矣旣觸蘇耽城郭之悲又抱  
魚風水之慟回溯子敬人琴之痛兼軫彥威朋儕之傷帶索  
行則百憂交至揜關孤坐則哀憤兩集覩顏視息不知人世之  
可戀也先慈窀穸已卜吉于十二月十九日而掃茅負土有待  
廬牟傾楮解驂誰爲飲助所冀慈靈早安宅兆則一身困躓八

口溝隍俱所弗計矣金陵旅舍與甘亭相遇其才力雄獨文藻  
富豔方之古人亦罕其偶而窮年失職戚戚寡懽涼鐙空館譚  
次時念閣下耳隆暑告謝商風戒寒木葉墮地長年易悲蟲聲  
扶戶獨客多警風騷騷而振野雲于于而墜天我懷伊人渺隔  
關隴何時得促膝談心一傾積愆耶搦管操觚言不盡意儻逢  
風便幸惠德音

與家芸墅書

曩在京華知閣下架學區中飛才甸外傳佳什於縑素馳俊譽  
于倫好下走之欽遲者有年矣顧眷條秋霽氣候莫同羈羽沈  
鱗差池不狎每懷雅度不禁神依迺蒙閣下謬採白望先枉赤



曠輕苔魚網出入懷袖英瑤繡段輝映几席如獲百朋喜慰無  
量昔人所云志均者相求好合者齊顏文章交道非偶然也循  
誦良書快讀大集嗚嗟任沈攀追鮑謝函宮吐角銷玉和鳴情  
往興來葩華萍布烟霞命侶苔竹寄懷于模山範水之中爲襟  
古切今之作流連逸藻嘯咏元風窮晨訖暮不忍釋手也某客  
髮衰謝學殖荒落早困風塵君實非撥煩之吏中更憂患苞邱  
愧學道之人茲復痛抱蒿蕘感深羌蔚回首受誓之歲傷心不  
髦之年失路蒼茫窮途潦倒畏飢驅我垂老依人以致李翰思  
枯鮑昭才竭何敢主張文字之盟管領湖山之勝耶惠詩四律  
天才掞張風藻黠發譬之飾混沌以須臾被土木以綈錦掄揚

過當比儼非偷溢目增華撫心多愧廢業之餘未敢酬和端函  
削牘聊有往懷帶水可杭相見或易鶴望佳問以代萱蘇

答張介侯書

睽闊光儀十易寒暑道里隔闕人事邇蹇未奉書問自知疏節  
而仰高瞻驥歷年滋多拳拳寸忱時在心抱迺荷閣下貽之良  
翰惠以德音椒桂之氣合於欽崙魚龍之感動於風雨攄纏綿  
之雅思暢經通之遠旨蘭杜芬馥琳琅清越長卿愿其文藻子  
雲慙其筆札萬遍循諷三陌距躍惟是獎飾踰分推挹過情流  
汗辭顏失容墜席敬惟閣下雅性都長天才朗邁玉璫璫猛黃  
鍾灑光品登明堂書校中秘司淵向之籍辨章舊聞摛卿雲之

辭潤色朝典發徐防之五十雖試李充之九千言長才曠度無  
所不淹西州聞人九牧稱歎邇未得久居承明迴翔禁省一命  
作吏遠踰丹徼羅施俗異牂牁路阻削牘移病投紱乞歸不慕  
朱文之軫甘守綠牕之帙含光鼂采收華稚節潛志墳籍殫心  
經訓默而好深湛之思舒而爲彬蔚之作挾精窮華擿伏發隱  
近復講藝龍門談經鱣舍學宗鄭賈文韋曹陸筆模規箴羣士  
步趨神墨靈式萬流慕習凡夫常擬星氣吹昌月行蠶門射法  
宜僚劒道劉昆清角趙定雅琴莫不元鑑在胸靈珠入握某初  
來關輔得讀黔書一斑驗豹半毛測鳳其紀載詳贍搜揚奧廣  
河圖括地輶軒絕代長沙土風之碑建康山水之志雖斐秀精

密闕駟通博以今方古殆有過之大雅謙冲恕其督論辨雌霓  
之連蟠忘蕪菁之唐突許爲真賞托以良知文字心交千里如  
面子休之于惠施君山之于班嗣無以喻也某鉞管小材蟲篆  
末藝文繡鞶悅刻雕冰脂賈山僅事涉獵江淹不嫻著撰詞賦  
百六家頗嘗留意經術上下古夙未究心掇拾邱言網羅瓊說  
風蟲露鵲助其呻吟病葉狂花同其迷悶間嘗嗽發投曲雕鐫  
屬辭大類辯人黃馬之談徒貽下士蒼蠅之笑茲者時邁齒載  
英華凋落亦思窺六藝之旨成一家之言而老覺氣衰疾令志  
沮萱蘇未樹鉛繫易疏慚公叔之精專遜伯業之篤嗜日暮途  
遠心耄力躓如嚇河之驪夫類移山之愚叟誠恐典籍腐敗學

業沈隕謖聞不遠沒世無稱耳兼之寄食殊方端憂卒歲入土  
鄉而友教借經舍以棲遲徒抱貞孤甘同淪廢雖謝淪未嘗拒  
客而王微不好詣人坐此闊疎遂相詬病黽馳穴逕藜蒿塞門  
嗟身世之飄泊惜朋儕之間隔目感氣草耳悲時禽倡古寡和  
呼今莫應宜乎述造之無成見聞之益陋也閣下垂念陳人曲  
加存問所望遠頒鉅製時示周行發其疹憤啟其羶癰俾鈍聞  
條達庸神曉冷則砥摩鉛鈍或並價于龍阿鞭策驚疴得齊蹤  
于驥驚君之惠也何幸如之邇惟攝衛惟宜道履多豫端商布  
復言不宣心

復張介侯書

前奉翰札如獲百朋璚玢在握雕績滿目辱荷撫謙曲加獎飾  
溟澥浩淼猶納汎濫恒岱巖嶭不卑部婁欽感之餘慙慙無地  
敬惟閣下素瓠習禮青藜照書華纂七英藻速十札潛神默記  
導引後進浮英湛德追蹤前哲宅心醇粹樹義淵奧瞻望英塵  
不勝欽仰承示大著實爲巨觀幽思詰屈琦字琰麗金鏗球鬘  
韞韞動心麟儀鳳師騰翥爲瑞身佩靈符指撫怪偉手脫神珠  
激揚霆電譬猶異錦百鐻誦采亂贊奇花四照瓊輝雷煜瑤宮  
玕殿妙臻異鑑珉膏雲液迴殊凡味和璧獻而瓊玖淪彩陽文  
進而娥媚失艷固足含咀班揚凌轍徐庾不圖衰暮覩此奇特  
彥昇則當時無輩持正則後代難繼捧誦流沫何啻絕編珍貺

秘藏謹用貯枕欽愛靡已贊歎欲絕拙著猥承見索茲特呈覽  
雉誇錦羽殊異鵠鸞狸炫文皮甯儕龍豹緬維往歲翔步藝林  
雖復枕肱圖史鑽研典策同傳毅之迪志等趙昱之下帷而早  
縛塵纓糾紛衆務中躋宦途流離孤寄文多率作詩皆漫興慙  
子長之愛奇惋次山之嗜瑣即今顛毛漣汨壯懷殫散枯桐氣  
索鍊不成雲衰竹心空吹難應律偶復命筆更難言文祇以絳  
愛遂敢布露蚓竅蠅聲彌增滌汗伏惟大雅進而教之不勝厚  
幸請院生徒比因秋闈試畢盡皆倚席不復橫經叢竹檀欒古  
槐蕭颯涼風乍起秋意薄人緬懷風範更增戀嫺覩縷奉覆敬  
候福履馳企之抱難以言宣

荅陸秀三書

都門握別七易暄妻途路隔闌人事邇蹇長圖大念隱心莫申  
比來背門瞬息兩載夏間一奉手牋略悉近況而秋試在邇生  
徒盈座帖括堆案疲精批閱久羈裁會寸心歉仄非言可宣价  
人就試來陝復接良書發函伸紙恍如覲面慰問有加詞意慙  
懇出入懷裏企想彌深藉稔足下杜門家居覃思文史採華落  
實著撰日富筆瓢粹茹聊以自娛膝前佳兒已見頭角晨燈夜  
燭發簾督課仲任閒靜公叔貞孤希風古人庶幾未遠某講院  
棲屑懷抱無俚方徂隆暑又值凜秋涼雨一天鳴蜚三徑鐙火  
青氈江湖自社鄉關羈思形諸夢寐至於出處久已自審木杪



才用又乏經濟肯以暮齒干於浮雲自脊令抱痛菴蔚銜哀故  
山松楸尙未成長悲淚承曉懸心若旌願學羲之歸營墓下貧  
冒苟進實非素心惠子知余諒不爲怪若輟西笑卽應南飛徒  
以一椽未卜八口長飢家室負累米鹽瑣屑卻顧無資前盼奚  
藉戀此片席以塞啼號未能決舍良用愀歎大兒正家捫攢門  
戶朋輩牽率近就南試文藝荒落無可覲倖次兒相隨俾習經  
義一知半解未見斐然鋤雲貧悴屈首經師近復多病呼醫飲  
藥偶得相見索翼寡歡迴思昔時分題角藝光景如夢渺不可  
追飄泊天涯惆悵何極足下如赴春闈定踐秋誥翦鋌聯榻冀  
僻離悰良會有時希惟珍重

答劉崧嵐書

崧嵐年大兄閣下仲秋望日接奉良書發函伸紙喜與忝會知  
閣下言辭京輦遄歸梓里游梁入洛復回邇城萬卷羅胸雙珠  
在掌人生至樂誠無以逾下風企羨非可言喻並稔閣下興逸  
區中趣寄塵外躡康樂之屐佩紫微之壺欲舉玉井之華蹠巨  
靈之掌氣豪拂霓詩奇問天名呼林央志擬禽向因命不佞其  
探幽奇自惟青鞵布轍本有前期翠巘丹崖屢入昔夢西風涼  
冷尋問真源極欲追隨以償夙願無如精力衰羸腰腳疲茶本  
乏濟勝之具又抱幽憂之疾覽鏡顧影則蒲柳呈萎臨壑怨遙  
則煙霞絕想足躡螳封之埵力殫魁父之邱散步行藥猶覺呀

喘而況太華千仞拔地倚天高峯尋雲深谷無景未能懸屋撒  
手固當望岫息心通天敞門欲觀栝柏之箭布地求福愧乏棗  
梨之錢既負嘉招又乖素尚臨風軫慨愴悵何言所望閣下清  
遊旣愜高軒早臨翦燭西窗藉傾積素會言近止何快如之

答呂湘皋書

齊年昆弟卅載睽離秋初趨叩高齋蹉跎不面蒲颿風利遽爾  
解纜迺荷閣下垂念故人河干延望遠辱手筆追路相尋託赫  
蹠于沈鱗寄削哺于羈羽文采鉅麗懋喻綢繆出入懷袖紙繒  
墨渝一日千周以當侍會並示大作太白墓表鯨鏗春麗驚耀  
天下卷裨海之長瀾攀鄧林之鉅榦謫仙有知猶應頻首鄙製

鬼瑱曾何足云猥蒙緒論曲垂獎飾撫衷循省彌增慙慙弟草  
土餘生家厝貧悴積石不食刮毛無瓊相如遊梁禦寇嫁衛長  
飢驅我垂老依人再入秦關事非得已牛屋星飯雞栖露宿中  
賢失意之賦節士愁思之歌精力銷亡髮客凋謝孟冬十日始  
抵青門就劉璣之經舍入周續之講肆耗歲月于蒲柳寄生涯  
于蟬蠶鄉路千里良儔三五感憶星辰驅役魂夢變而不見我  
勞如何恂齋南歸刻日遄發恩恩搦管聊布往懷稚存味辛諸  
兄不及札致晤時幸爲道念天氣嚴寒伏惟保愛不盡欲陳

與陳雲伯書

自遠譚讌忽更歲籥山川超緬鱗羽淹滯每懷雅度怒若輞僂

敬維閣下製錦宣猷鳴琴著化侍奉多福循蘭在陔拊循有方  
拔薤當戶臺府賞譽閭閻歌頌俊譽雷頤清聲颺起下風傾聽  
喜與并會某遠越隴坻坐守經舍做瓊折几蕭寥無侶戒香定  
水枯冷如僧涼風颺駭秋陰黝儻廣除十笏荒宮五畝寒卉宗  
生幽鳥族聒每當晦雨溟沐長廊隱翳壁苔紅綠色類殘畫砌  
蟲啍啍聲應古瑟對茲岑寂殊乏趣向慨焉寤歎念我故人莫  
由咨覲彌增苑結加以偷好殊寡呼唱莫應帖括填委苦乏秀  
異丹黃點注彌損神智才思轉退撰述亦稀每念閣下快字凌  
紙俊語罪屑每示一篇輒諷百過譬猶神鄉奇帛經緯騰輝海  
國異香肝脾沁馥聯離日久吟咏更富愛而不見搔首踟躕何

當郵示慰其索莫至於旅遊寡味徒事羈泊僚黨謔歡更無結  
納貲悴冗散有似孝標潦倒羈疎竟同叔夜徒暖妹而自好甘  
貞孤之不諧無如甄宇篤學終累家室向平肆意未畢婚嫁生  
計蹙迫方寸堙鬱每翹首南望未嘗不自悔西笑也小兒夔生  
兩謁高齋備蒙款洽閣下念其饑貧加以周恤俾昌黎舉室暫  
止啼號史雲窮居不須拮拾分金指困誼等古昔响涇濡沫道  
其有無高義如斯銘感尤極某射猶觀於兔首味無戀於猪肝  
興切葦鱸夢繞松桂會泛江頭之棹伫陪湖上之尊相見匪遠  
馳神轉切端函削牘敬候近祺書不盡言但聞爰繫

答岳一山書

春明盡宗訓，醉歡洽山川。隔闌星歲遷，寶光景莫接。波濤寸心駐，車關輔談藝。橫序坐戴憑之遺席，擁馬融之舊帳。屏營無已，馳叩倍增。遠辱損書，曲蒙存注。子元論議懸河，注瀉令明。辭義澄波，淵映披牋。雖誦不勝，慙服敬維閣下。早辭清要，夙標高尚。白華致養，詩咏壽康。冰鑑衡文，士欽精藻。總攬英偉，搜緝文獻。高風遠洽，化雨溢流。駿譽日隆，多文爲富。植耳逃聽，欽挹良深。關內神臯，人文蔚起。惜其往歲，捧檄遠在邊鄙。今來主講，又陟結納。暖姝藏拙，孤陋抱愧。一時賢達，罕通紉綯。幸得指示昭若，發蒙藉茲品題，可希津逮。物色異人，從茲始矣。每怪秦中自三李，山史豹人諸先生。後詩文傳播音響，沈闕既而思之，蓋非人。

材寥落步武乏絕良由表章無人是以湮滅不顯卽今屈指已  
得數人或紹詞賦於淵雲或辨聲形於倉雅強君星學則甘石  
之經也介侯黔書則裴闕之志也並世如此前此堪知昔元文  
五千尙煥覆甌紫宙三萬幾無剩牘謨觴古簡半歸蝨蝕宛委  
殘編悉聽鼠齧流傳之難古今同歎伏維閣下望崇闕學蔚爲  
儒宗繼揚李之淵源奮王康之文華土壤不讓羣士學山魁杓  
所指君子秉斗則綱羅遺佚補綴殘缺擴懷舊之蓄念發潛德  
之幽光非異人任也久勞道訪定多創獲一經著錄卽播遐邇  
斷石而寃璞呈輝揮波而遺珠迴照宣揚風雅嘉惠後學甚盛  
事焉某雖衰鈍樂觀其成尙望閣下以副厚願講院生徒向荷



三才集卷一  
教澤卽今馳企悉感化裁守丁恭之講義遵劉昆之典儀文學  
皆欲就匡衡朱墨則猶傳董遇糜醢所漸風流未沫臯比繼擁  
教授空勤無袁遺之篤學詎可爲師異崔儵之讀書聽其入室  
元惟尙白青易出藍內手捫心良增慙慙何當時聆屑鋸教以  
斷輪永戢觥規庶寡嚮咎至承渥愛問及出處關念篤摯感佩  
靡涯某少無宦情誤糴塵鞅毛義作吏實資祿養顏駟爲郎卽  
同引退今者永抱風木之悲長茹脊令之痛久傷哀樂更乏趣  
向且日月逝邁精力衰耗等長卿之瘠渴同子雲之顛眴顧茲  
疲茶豈期榮進稍謀山資卽返野服幸畢願於婚嫁庶樂志于  
邱園雖復公叔貞孤史雲單陋生計蕭澹經營拮据然道在日

損性無所溺處茲窮約亦當有以自娛耳拙著詩文曾付剞劂  
並求是正以祛蒙霧自維少尙偏奇老謝精詣智慧日減撰述  
亦稀同許惛之隱几愧君孟之伏書炳燭已遲懷鉛徒奮所望  
加以繩削賜之甄錄俾附駟驥以長傳不其戾蟬而俱朽其爲  
感激甯有旣耶

復法梧門書

敬復者某于去歲恭閱邸抄伏讀

上諭以內府所藏全唐文宣付文穎館令詳稽載籍加之補輯  
校勘完善進呈

乙覽刊刻頒行欽惟

聖祖仁皇帝

欽定全唐詩海內奉爲矩矱我

皇上崇文講學嘉惠士林

聖治光昭後先繼軌文章際會千載一時凡方聞向學之儒萬  
頸胥延以先覩爲快竊謂自漢魏以來辭章著撰之富無過于  
唐玉海金淵莫測涯涘先生以通博之才領纂輯之任搜羅散  
佚冀無闕遺猶復采及芻蕘以編次之例殷殷下問不揣樛昧  
敢以管見所及爲閣下陳之按藝文志有總集之目有別集之  
目如文選唐文粹文苑英華所采詩文分體編纂此總集例也  
若專家單行則謂之別集

欽定全唐詩則彙別集而爲總集篇章宏富蔚爲大觀其例以  
人繫詩時代先後秩然不紊今全唐文亦應遵照此例編纂其  
人之名位不顯者當考其出處交遊按年靡入庶無舛互此體  
例之宜審者一也按全唐詩于諸家之有專集者逸篇必錄其  
無專集者單辭必收今如王楊燕許韓柳諸大家文集其完好  
者無論已然而釋迦成道之記子安之集失編西域經記之序  
燕公之文不錄自當旁搜博采補入集中至若馬賓王之章疏  
郭汾陽之表奏鄭台文之露布見之唐史而無專集者指不勝  
屈偉人鉅公猶復如是其寒畯單門一鱗片羽零落者又復何  
限應徧檢新舊唐書佛藏道藏及別集之附見者

如李太白集  
之有范傳正

碑昌黎集之有李漢序杜牧集之有裴延翰序是也

以收散佚此體例之宜審者二也按

全唐詩選詩而不及賦以賦雖古詩之流而其體則近於文也唐以詩賦取士功令所繫故作賦者尤多今諸家之有專集者其賦自冠其文以行至如盧肇海潮何諷夢渴之類一賦之外別無贅撰場屋覓舉之士僅傳一賦者不可勝數全唐詩有止登試帖一首以存其人者今之錄賦亦當如是此體例之宜審者三也又考唐人文集兼有子史如昌黎之順宗實錄杜牧之罪言劉蛻之鼎書羅隱之兩同書皮日休之鹿門子其本在集內者自己全歸著錄其在集外者如國史補諷書符子之類卷帙綦繁如欲盡采則盈箱充棟如竟置之則與他集之例不

符此體例之宜審者四也按全唐詩采晚唐之詩兼及五代是以韓偓韋莊孫光憲等之小詞均歸甄錄蓋韓偓諸人雖託身弱國而俱係唐臣是五代之于唐猶餘分閭位當比附以傳不能離異也歐史不載文字薛史間載詔命章奏之屬至馬令南唐書所載之文俱係全篇吳任臣十國春秋雙行小注中采文極爲詳備其餘諸國霸史如有遺文均應采入附于末簡此體例之宜審者五也至小說九百本自虞初千寶搜神吳均志怪列仙之傳靈鬼之記漢魏以來篇帙甚夥洎乎唐代爲類尤繁按全唐詩凡童謠里謔之辭勞人思婦之什仙靈詭怪之語滑稽慢戲之流片語必登罔有遺漏以此類推唐人小說不下千

種廣記五自已不勝收或當列之外篇或竟置之別錄此體例之宜審者六也再厯觀唐之初盛中晚自貞觀以至龍紀作者往往以駢散序言冠于詩首致爲詳贍如王勃之滕王閣王維之送秘書晁監柳宗元之平淮西雅全唐詩於此類則登其詩而并錄其序然文可以入詩詩不可以入文今將錄其序而遺其詩乎抑并不錄其序乎此體例之宜審者七也至東書所云金石文字頗難搜訪然近日如王述菴先生之金石粹編搜羅最富涇川趙琴士之金石文鈔校勘尤精其餘若據金石之家自歐趙至今不翅百有餘種似尙無難裒集惟是吉金樂石厯年旣久剝蝕寔多志金石者或可以闕文存疑若采入全唐文

則當旁引曲證以期完善是則搜訪非難而考証實難任其斷爛既難入於簡編妄下雌黃又恐滋其附會此體例之宜審者八也頃聞此書總裁皆當代宗工又得晴芬石士芙初諸君爲之分纂而先生潤色其閒撮指條篇原原本本而文淵四庫所藏唐人別集極爲美富行見勒成一書高文鉅製照耀千古上克副乎

聖心下加惠于來學豈不懿哉某無袁遺之強記如師丹之善忘精力銷殘學殖荒落平生記誦十不得一聊布區區之忱冀垂省覽焉某頓首再拜



芙蓉山館文鈔卷二